

李文恭公遺集

皇清誥授榮祿大夫

欽差大臣太子太保前兵部

尙書兼都察院右都御史兩江總督

諭賜祭

葬 子謚文恭先府君行述

烏乎天之見絕於

不孝概

等何其酷也昔歲戊戌

吾母郭夫人棄養長兄

杭

及

不孝概桓

皆十餘歲

痛念失恃悲號不能已府君諭之曰汝母死我固
在也汝輩終日哭設致疾我能無憂耶我以汝母
故方大傷悼汝輩又將貽我戚於心忍耶皆伏地

泣受命痛哉痛哉今甫閱十四年府君復棄

不孝

等而長逝矣天平何不殞滅

不孝

等以代我府君

耶何奪我府君之速耶

不孝

等罪通於天萬無可

追憾不驅螻蟻於地下追侍顏色尙何言哉尙何

言哉惟痛念府君厯事

兩朝鞠躬盡瘁學問事功爲當代推許

不孝

等同生五人

長兄

杭

已前歿敘述遺烈責在

不孝

等不敢不偷

生忍死臚列事實以備

國史採擇兼呈當代名公賜以銘誅垂示將來感且
不朽謹飲泣濡毫跪而述曰

府君姓李氏諱星沅字子湘自號石梧先世居江
右豐城元以前譜缺今著於家譜者第一世遷伍
公諱肇湘元統二年甲戌由豐城徙居湖南長
沙府北之夏宜港明洪武初隸籍湘陰卜居邑東
高華里是爲遷湘始祖第二世膺祿公諱基寬官
四川叅將以武功顯第三世德誠公諱晟縣學生

其後世業文學爲邑著姓至十二世克超公諱賢
賓於府君爲太高祖十三世輝遠公諱逢璜爲府
君高祖曾祖德芬公諱發芝妣氏楊祖玉屏公諱
世亮妣氏彭始寄寓省城生子二長壽田公諱疇
優貢生桂東縣學訓導府君之考也曾祖祖考皆
誥贈至榮祿大夫兩江總督曾祖妣祖妣皆一品夫人
壽田公配陳太夫人累

封至一品太夫人壽田公生子三府君居長誕之前一

夕陳太夫人夢神降庭中次日舉府君爲嘉慶二年丁巳六月十四日酉時府君生而謹敏五歲受書數十行俱下壽田公力治樸學終歲讀書麓山以時省親輒課府君讀顧日程繁夠督責嚴府君輒如其意以應無難色如是者三年時猶八歲九年甲子壽田公以優行貢成均旋考取

武英殿校錄十一年丙寅秋假歸府君以詩文進壽田公疑出他手面試之合喜語人曰他日大吾宗

者在此子也十二年丁卯壽田公入都明年戊辰
府君出應童子試縣府揭名皆前列時十二歲髮
垂甫過肩神童之譽徧於戚友然益謹敕不自矜
異連歲從長沙張鐵菴先生祈諤舅氏陳堯農先
生本欽遊所學益進兩先生負文名皆獎許之壽
田公連絀京兆試校錄議敘選桂東訓導十九年
甲戌秋南旋次河南輝縣卒府君聞訃號痛奔喪
扶櫬歸迄葬一切稱禮家益大落玉屏公春秋高

幾無以爲養陳太夫人勤女紅日以所入供甘旨
又貲簪珥貸於至戚具束脩命府君專讀書繼先
志毋問家人生產府君痛念壽田公苦心績學未
獲一第齋志以終家無擔石儲益自刻苦乃請於
太夫人授徒家塾歲入數十千錢佐家計與兩叔
父涕泣發遺書銳意誦習偶觸手澤輒嗚咽誦聲
或斷續日課徒無暇晷篝燈坐讀漏四下不倦以
爲常體故弱自居壽田公憂哀毀甚遂大羸瘠久

之得咯血疾太夫人憂之嘗手製蓮湯命之飲府君泣然曰以兒讀書致母勞適重兒罪且赤貧如此安得有餘錢及是請弗爲兒念後遂不藥愈廿二年丁丑以縣試第四人郡試第一人補弟子員學使宜黃謝向亭先生階樹亟賞之府君自丙子以來應城南書院月課題出恒爲兩藝以應詩賦亦如之山長衡山羅湘舟先生奇其才目爲國士屢拔冠曹輩才名藉甚時我外王父湘潭郭公汪

璣與羅公過從密閱府君課藝大器賞謂不僅爲
才子當爲名臣是年春訪府君於家塾盡覽所爲
詩古文辭益歎異不絕口遂以次女許字以明年
戊寅來歸是爲吾母郭夫人廿四年己卯鄉試報
罷鬱鬱不自得先是益陽蔡學博士用錫嘗稱府
君於安化陶文毅公文毅公與壽田公雅故知府
君久時適官川東道亟招府君入蜀掌書記文毅
公治事勇每有要務須啟大府者輒以大畧口授

府君屬卽以眞書繕不假起草府君援筆立就曲盡事理嘗爲上制府書陳捕務文毅公畧論顛末立俟書成時冬夜寒甚府君呵筆成二千餘言皆出腹稿書上制府蔣礪堂相國以此事此文極加贊美後詢文毅公知出府君手大奇之文毅公嘗語府君曰以子之才多讀經世書將來位業未可量也府君感激知遇執弟子禮終其身道光元年辛巳補廩膳生受知於學使晉江許萊山先生邦

光秋試侂中復落受知於房師臨桂李竹溪先生
光瀛旋丁玉屏公承重憂治喪葬如喪壽田公時
連歲館益陽沅陵瀏陽歲時伏臘輒歸視陳太夫
人五年乙酉中本省鄉試舉人房師爲鎮海胡竹
安先生鈞座主爲貴筑張曉瞻先生曰最宿松石
愚泉先生綸丙戌己丑兩赴禮部試報罷湖南方
伯裕莊毅公延掌奏記凡六載相得甚歡十二年
壬辰成進士房師爲宜黃黃樹齋先生爵滋座主

爲大冢宰潘芝軒先生大司冠戴簡恪公大司空
穆鶴舫先生朱文定公

殿試卷進呈第二甲第一百名

朝考入選第十二名引

見

成皇帝御筆已於府君名加角用主事矣

垂視良久改加園用庶吉士同列異之長安不易居日用
無所出仍以授徒自給十三年癸巳散館授職編

修充

國史館協修協辦院事本衙門撰文旋以大考二等
十一名

賜文綺十四年甲午奏辦院事充功臣館提調旋充四川
鄉試正考官副考官爲宗人府主事汾陽彭文作
邦得士羅文光等副榜楊玉堂等如額時張曉瞻
先生守成都揭曉闡藝出極稱府君得人十五年
乙未充會試同考官得士十五人及

廷對房首劉繹一甲第一共入詞館六人分部曹三
人外用知縣六人所進稱盛六月史臣輪對蒙

召見一次

上詢家世歲數及館職甚詳移時始出旋奉督學廣東之
旨請

訓之日奉有立品去私之

諭時道州何文安公官大司空公厯任學政所至有聲府
君往謁以遴才剔弊請公手錄數十則答之並歛

手曰子虛心若是吾卽此爲粵東人士慶得好學
政矣十月抵任時前任學政王公植以新授閣學
入都歲試尙未周也府君念學臣所以造士士習
端則民風止當以身先之聞粵東優等生員及新
進文童覆試尙有交納解費書金開門費各名目
示革之以士習健訟札飭通省府州縣立生員稽
訟冊所有訟件分爲三項一各生出身訟人一各
生被人訐訟一各生於不干己事牽涉訟案有名

皆摘敘案由註明已結未結列冊鈐印分季詳報
其案情較重者隨時申報就案重懲粵省鎗冒等
案廩保向多不究以致犯者愈夥因特諭連環互
結外每學再具聯名切結一紙令該生等親押送
院無論文武正場覆試及考試經古均須案前答
保一有前項情弊該廩保除得賄者按律治罪外
餘必照例斥革永不開復示出土林凜然諸弊一
洗試日扃門命題後公服坐堂皇監場官旁坐丁

胥輩悉入之宅門非呼召不得近巡號蓋戳亦親
督監場官爲之至齊卷始退雖兩膳亦在堂上不
白便也試卷除取錄外遺卷皆一一繙閱卽於堂
上點定揭曉衡文必衷醇雅初試高州以根柢宏
深者甚難其選因爲簡明條約以讀經書法切實
勸勉又以詩句多操土音因備論聲韻之學指示
詳盡每一等生員及新進童生榜出尙未獎賞特
命十二詩題限日作成送閱又命六經詩題六十

徧給諸生作窗課令於次年科試前呈閱詩學爲
之大振試惠潮嘉三府州以地處南陬習俗殊於
各屬因約舉四事出示告戒其畧云無械鬪自取
刑禍道在講讓息爭無健訟自貽拖累道在見利
思義無淫博自損身家道在棄邪歸正無浮侈自
招窮困道在崇儉黜奢又於嘉應州特示兩戒其
畧云一戒訟師構怨尋仇孽由漁利天刑人禍一
瞬交加切勿自恃刀筆一戒鎗手行險徼幸苟且

偷生名辱身危萬事瓦裂切勿自罹網羅其力挽
頽風類如此時屆舉行選拔粵東向有正拔幫拔
名目旣嚴杜弊源復申諭勸勉有始進不端終身
有玷他日立官行政安能遠大相期之諭諸生悅
服故丁酉科粵東拔貢生咸以爲品學兼粹云十
六年丙申四月給事中曾公望顏疏請飭禁廣東
學政考試陋規奉

旨飭禁府君具疏覆陳其畧云

臣

自上年十月抵粵訪聞

本衙門吏役於新進文童覆試及生員考列一等
舊有陋規藉爲辦公之費臣核計每年廉俸足敷
用度何敢因沿積習致滋吏役弊端卽於按考高
州瓊州等府牌示禁革在案茲於雷州府考次欽
奉

諭旨訓誡周詳遵卽再行剴切申明嚴加飭禁使數十年
積弊一概掃除惟以叢弊之地當革弊之初誠恐
吏役人等別營利藪謹當隨時隨處嚴密根查倘

有違犯立加懲創以冀永遵

功令至拔貢十二年一科自宜認真考選

臣

於四月

二十四日又欽奉

上諭飭禁卷費冊費考費各項陋規

臣

前爲諸生時輒聞

考拔卷冊由學申送每有不肖教官視士子考等
之高低定冊費之多寡需索不遂竟不送考此等
流弊粵省恐亦不免業經諄飭各學凡考列優等
生員均令備造卷冊一概全送候考其實係本生

不願考者令查明事由於冊內簽注以免阻抑而
廣遴取再查新中舉人赴學政衙門填寫親供向
來書吏陋規早經前任革除合併陳明六月奉

硃筆密諭訪查

欽使會同總督審擬吳毓鈞盧應翔一案確當與否及原
審之

欽使並司官等有无賄託情事尋訪查據實密陳十七年
丁酉十一月任滿乞假省親奉

俞旨以十二月抵長沙府君自館選後應大考典蜀試校
禮闈珥筆乘輶踵接少暇及抵粵東任始郵書兩
叔父奉太夫人就養使署粵東地濱海苦潮濕太
夫人起居恒不適積久致患氣脹是年夏兩叔父
歸應鄉試遂奉以南旋府君懸念甚苦至是得一
月歡侍焉時太夫人夙疾方愈府君及郭夫人合
刻梧笙館聯吟初輯成長兄杭新娶婦卽夫人女
姪亦能詩長女楣及女甥輩方共學詩春觴歡集

闕韻爲樂府君親第甲乙博太夫人歡嘗曰此樂
不易得也十八年戊戌正月復

命北行途次奉

旨補授陝西漢中府知府四月到京

召見一次

上詢粵東吏治文風據實陳奏

天語褒勉有爾在廣東學政辦事認真操守好不必說我
放爾知府並無人保舉好去歷練我只望爾能始終如

一豈不是國家梁棟之材云云蓋

簡在已久也五月抵任漢中屬邑皆在南山中棚民雜居
獄訟甚夥府君日坐廳事重門洞開有赴訴者立
予訊斷書吏規費悉罷之所屬廳縣差役素貪惡
凡案關差役取賄者卽先行提問極刑懲治此風
頓止胡腥羶子者巨匪也吏不敢問府君訪獲之
命荷重校游街市每堂事畢輒重杖之令民聚觀
莫不稱快漢中鎮總兵駐郡城標兵獷悍難制與

民訟該管官輒庇兵以故益玩法時總兵爲長白
德坤公府君與約凡兵民交鬪聽地方官繩以法
以是終府君任兵無敢恣肆者郡城濱漢江俗尙
嬉遊春夏間婦女雜遯於道嚴示禁革街市肅然
書院諸生以經學敦勉之獎勵優厚受事甫匝月
輿頌大作耆民以爲自太守澈浦嚴公如燧後賢
能無與爲比六月奉

旨補授河南糧儲鹽法道漢郡人愛戴不忍舍因書德偕

漢永四字於幃以進府君亦悵然爲四律與士民
別九月抵任河南漕米向分四廠兌收府君以弊
源所自出開厥之期必親督之州縣漕米到卽過
驗書吏無從朘法攬和偷減諸弊皆絕漕船行次
應在山東前五幫之後後五幫之前近年東省漕
船率多漫越前後錯雜致兩省弁丁互相推諉或
誤抵通例限因移文山東糧道援引成例定於德
州四女寺一帶爲停讓地運行得以無阻至今賴

之汝寧府屬羅山縣河口寨地方向爲票商運鹽孔道一由西至縣城四十里一由南至縣城百數十里縣令某以南運近湖北界率多販私護私請改從西路行稟由巡撫劄議府君議以改道西行意非不善但迤南一帶豫民食鹽必致騰價若另設子店更恐胥役爲奸後患尤甚汝光票鹽價賤楚北綱鹽價貴偷漏在所不免緝私之法惟在就案重懲原稟應無庸議事遂寢十九年己亥六月

署理河南按察使具疏陳謝奉

硃批勿失書生本色一切公事最忌虛浮勉之慎之勿自
棄之欽此河南刑案頗繁司署向多積壓府君極力清
釐每間日一錄囚雖盛暑不少懈司獄爲空時伏
熱特甚恐諸囚病飭所屬急清囹圄嘗曰囚罪而
死死於法病而死死於官且罪應緩者病死固促
之死也罪不赦者病死則是幸逃顯戮無以正刑
誅也有孔瞎子者素無賴以推算星命爲業妄言

劉氏子及楊氏女命皆大貴語悖甚有已革文生
雲從澁爲之徵並代作匿名帖煽惑鄉里愚民多
信之劉楊兩姓懼禍及皆首於官縣訊通詳巡撫
提犯審訊將以謀逆究黨與府君曰此妖言惑眾
律有明條若以叛逆論左驗何在旋治首犯二人
如律餘聽悔釋全活甚眾九月回任二十年庚子
四月督運抵通州歸次直隸保定府奉

旨補授陝西按察使旋入都

召見三次以交印仍回河南便道履勘衛河隄工步行赤
日中二日以前在通州曾奉巡撫來文也六月抵
陝西署理布政使先禁革所屬私餽飭州縣非因
公毋進省因公至者事辦卽促行凡屬吏進謁必
虛衷採訪然不可干以私披覽公牘必詳盡有疎
忽者叅罰不少貸署定邊廳某三次來稟均稱地
方安謐府君於該管營員公牘中查得廳屬小市
地方有刀匪白晝行刦之事嚴劄行查稟覆未至

或以書來爲緩頰府君覆書云沅入關未久一切茫然惟就公事之是非定人才之高下倘有託詞延宕任意苟安不得不隨時懲戒以肅吏治非擅作威福也廳員某仍撤任停委一次藩署書吏弊端叢雜接管卷內有吏書韓吉祥承辦典史某緣事斥革扣算奉到院行之期延至一月匿未轉行戶書李善餘承辦留壩營道光十四年應領款項至今參錯皆重懲之積弊頓清十月莅按察使任

與屬吏約凡命盜案件可原者原之其情節重大者務必從實勘辦毋惑於救生不救死之說附會故出致玩刑章錄囚除背誦供招陋習必反覆詳詰務得實乃止平反甚多其最要者如佛坪廳招解賊匪陳鑽娃誣扳肇釁致周繼娃墜岩身死一案廉得廳差羅貴張洛等六名向與周繼娃有隙當陳鑽娃被繫時廳差等唆使誣扳周繼娃訛索並用繩拘繫將鐵鞭毆傷致周繼娃情急墜岩身

死原招以賊匪當重罪置窮惡蠹役不問尋從實
問擬石泉縣招解周明珠同王某毆斃陳老么一
案原招以陳老么爲兇惡棍徒究詰兇狀絕無證
據知爲周明珠等減從擅殺律問擬也亦飭從重
定讞嘗語人云此等重案如不平反生者玩法死
者含冤何取提刑爲哉又嘗精擇律案要義輯錄
成帙或加案語或加注釋時時繙閱情罪洞曉以
是理刑無枉縱十二月奉

旨調補四川按察使二十一年辛丑二月抵任四川情形
府君夙所深悉下車以治蜀貴嚴一語請之總督
徧戒屬吏川中嚙匪素強暴每大夥被拏勢迫或
闖入民舍將平民老弱者細縛二三人聲言兵役
拏我我便殺他謂之跌紅案其自被拘拏者謂之
跌黑案厯任辦理嚙匪多從鬪殺科罪故匪黨亦
以跌紅案爲得計遂至無辜受害沈寃不雪府君
出示通諭凡有犯跌紅案者必照跌黑案加等科

斷並申嚴兵役協緝章程勸懲並舉旋指名訪獲黃成富張母豬油林狗兒林牛兒黃興濫保徐二娃等十四人皆川人所切齒者六人皆擬斬梟餘八人斬決者二絞決者六總督意良不忍府君堅持之行刑之日觀者如堵夾道呼青天按察司不絕旋有編輯府君緝匪事畧爲興頌四篇梓行囑匪由是懾伏餘如煙匪訟棍等咸避去六月奉

旨調補江蘇按察使候代有呂代郊者亦著名囑匪也屢

千大辟經歲未獲府君訪知匿迹簡州境內密劄
州牧捕拏牧以府君將去任詭稱鄰境安岳縣業
已拏解劄詢安岳無其事府君撤牧任方伯某公
頗護之故事屬吏撤任兩司會詳應由藩司主稿
方伯以緝匪不力無與藩署公事推府君主稿意
在緩之也府君毅然定稿會詳撤之嗣牧至省方
伯左袒益堅州員缺久不委代欲仍飭令回任一
日期會府君啟總督云簡州撤任經本司會詳憲

批如所請現在久不委署自係欲飭回任此意出
自憲臺則當先叅臬司草率詳撤若出自藩司則
當自請檢舉不應與臬司會銜斷無忽撤忽回之
理院司皆無以難當官執法類如此八月卸事代
任者爲張曉瞻先生師弟交承一時傳爲佳話官
蜀半載民戴其德後巡撫陝西通侯楊海梁先生
自蜀赴京來訪一見重拜曰爲吾蜀億萬生靈祝
公晉川督也十月入都道汧縣距漢中郡半日程

因減從往郡人愛府君如父母至是喜再見多持
豚酒以進府君爲勉留一夕十一月抵京

召見三次奉

旨馳驛赴任時嘆咭喇由粵閩擾及浙東揚威將軍駐軍
蘇州地偪人稠客兵屯集重以水災後饑民羣聚
剽食游匪乘之各鄉閭然府君示禁之外輒夜行
街市訪查彈壓風雪不少休設法資送回籍擒滋
事者數人擬罪如例大江以北素多盜如捻匪曳

刀手就案懲治之民賴以安軍情緊急文報向多
逾限因添設腰站申嚴禁令驛務大振十二月奉

旨補授江西布政使三十二年壬寅正月奉

旨調補江蘇布政使兼理按察使十餘日時揚威將軍移

軍杭州嘆咭喇屢抗浙師兇燄甚熾江蘇沿海戒
嚴省城設立糧臺寄存浙餉而軍火器械悉於此
分局監造府君與前湖北方伯孫公善寶督辦辨
色卽興夜半始寢如是者數月於橫河來鳳橋設

立水閘或以爲太少府君曰閘在扼要不在多多則兵役索詐適擾商旅且文報緊急水驛以船代馬何能節節守候致誤時刻此處設一總閘足制要害於詰奸爲便仍於驛務無誤也五月上海寶山失守提督陳忠愍公陣亡兵勇潰逃多奔省會人心震恐旦夕將內訌府君請於巡撫凡實係潰兵潰勇暫行招留令其防守省城立功贖罪藉免滋擾嘉定一帶難民亦日以千百至各典因止當

府君密飭首縣以濟貧始能保富之義反覆開譬
典當如初難民得戢六月鎮江失守近省土匪羣
肆抄掠楓橋距城數里卽有搶米之案時按察使
崇恩公防堵出省府君訪獲搶犯四人請於巡撫
卽行正法梟示羣匪散匿七月嘆咭喇受撫於江
寧客兵分起歸伍府君卽詳撤糧臺改爲報銷局
節浮費也督糧臺數月軍需支應晷刻無逾因念
帑藏有常凡可省者悉從撙節各帥調用大餉亦揆

度情勢量爲轉輸以是大帥中有與府君齟齬者
嘗上總督牛公鑑書有云總局紛紜根蠹節蠹人
心如面人願難償以樽節之愚誠負拘泥之小過
雖不任受亦不敢辭靜候軍務告竣及早自劾牛
公深爲慨然時淮南監掣謝君元淮有改鑄銀餅
圖說稟由總督劄發詳議府君上書極陳不便其
畧云謝丞議鑄銀餅誠如憲批不爲無見然亦有
難焉者如謂試行之初必由庫項當此州縣徵解

拮据萬端孰能先出藏金從容改鑄其難一也如謂酌加火耗以示體卹恐地方官奉行不善適於重困之日益以浮勒之名民未見德先已受累其難二也如謂洋銀騰貴改造終覺便宜然人情可與樂成難與謀始舍舊旣非所願圖新又未可知其難三也如謂因勢利導有開必先萬一導之不從先之不繼此爲貨貝彼爲土苴枳北橘南所至扞格其難四也如謂銀餅旣成洋價必落竊恐其

來有漸所積已多並行則商販依然不並行則操
切多故其難五也如謂解部正欸仍復照章傾鎔
將易寶而爲銀又易銀而爲寶朝三暮四未免紛
歧其難六也如謂隨意改爲無須入告則庫中解
項忽盡化爲銀餅來固不易去亦無權變更園法
誰任其咎其難七也以時論則兵災薦臻實無暇
日及此以勢論則古今利柄不自君上操之一法
立一弊生且法未立而弊先見法愈變而法益窮

前者林公撫蘇以足紋仿洋錢商民疑爲偽造錢
公藩浙亦令州縣正欵搭解銀餅一成均以不行
中止事關軍國不敢不慎之又慎事尋寢句容金
壇溧陽三縣種山之利甚鉅然業者皆台州人非
土著也府君以山藪中每藏奸匪詳定已開之山
添卡巡查未開者永遠封禁州縣補署必以人地
相宜爲斷嘗曰上司一言調劑卽是爲人擇缺卒
之缺累而人尤累不如因人而施也司庫欵目繁

雜嘗製巾箱本按期載所出入有弊卽覺無可相
蒙者十月奉

旨補授陝西巡撫入都

召見七次二十三年癸卯正月抵任報到任疏入奉

硃批諸凡勉力認真萬勿有負委任之意又曾記朕舊作
有云勿爲誘化固初心汝其致意焉欽此府君三至關
中前任兩司時風裁甚厲此次開府重來官吏多
避叅先去有安定縣令某以探聞府君意欲甄黜

前來乞恩特先疏劾之落職其餘才不稱職者降革數員官常大振同鳳一帶多刀匪帶刀遊蕩名曰刀客又有紅錢黑錢等名目忤法肆劫掠民苦之府君以匪徒狡橫非軍民協緝不可乃出示申嚴禁約其畧云無論軍民人等遇有匪徒不法卽行緝送到官若輩旣自外生成卽應置之死地官旣與民除害民必與官同心合力兜擒盡法誅殛非特永無後患亦且各有優賞檄行各屬粘貼賞

罰隨之以是陸續擒獲巨匪二十餘人又通飭所屬嚴科差役詐贓斃命罪其畧云有司衙門差役原以承緝案犯爲民除害而設也今則不爲民除害轉以害民或私押生根浪索無厭或指官威嚇株累無辜因之恃強徇勒誣竊弔拷以鐵鍊爲刑具以硃票爲護符以鄉里爲魚肉以人命爲草芥現查陝省各屬差役詐索斃命威徇輕生及用鍊拖拉拷打平民致死之案層見迭出雖其中情罪

虛實輕重各有不同然狐鼠橫行狗彘竊食善良
幾難安枕勢已不可勝誅地方官稍有天良宜如
何深惡痛絕從重懲創乃平日相倚爲命管束不
嚴一經差役有犯則必預存成見多方迴護動輒
改裝案情化大爲小刪減人數以少諱多又其甚
者死者本有傷而驗爲磕擦死者本無罪而污以
奸邪推其極力鋪張憑空結撰不過欲辦成擅殺
貸差役之死耳試思同此性命同此肌膚衙蠹何

親百姓何疎乃論法傷人者死而差役獨不抵罪
差假官以虐民官枉法以庇差恐死者有知必以
厲鬼相報矣查差役知法犯法例應加等儻因自
顧考成遂敢顛倒出入揆之天理安乎不安返之
人心忍乎不忍本部院恫瘼在抱因差役之害善
良而憾深次骨卽因官吏之護差役而戒切噬臍
除將現在各案提犯嚴審定擬外合行劄飭云云
刁風稍止尤重武備極力整飭陝省火藥以礪磨

而成質粗力小乃飭改用杵日照數春足務求猛烈會疏論擡礮擡鎗亟宜教演奉有因時制宜之諭因取自明以來諸兵家言火器者摘錄數十則刊爲一冊名曰練兵須知分給各將弁仿照造演營弁補署差遣咸以親試技藝爲斷不拘資格其各營弁兵按月親操明示賞罰不少假吏役手未半載各營技藝皆進軍政秩然四月兵部議裁伊犁鎮總兵改設直隸天津鎮伊犁將軍持不可復議裁西

安鎮奉

旨如所議行陝甘總督富呢揚阿公擬將西安鎮標額兵
分隸陝西撫標及城守營撫標添設中營原設左
營叅將改爲撫標中軍原設右營遊擊改爲左營
遊擊應設右營遊擊卽以鎮標左營遊擊改撥府
君議以鎮標左營遊擊舊設弁委不敷管領應酌
添經制外委三人額外外委四人適固原提督某
公函商城守營叅將隸兵較多應以城守營叅將

改爲副將卽以神木營副將對調議均未定兵部
旋議奏伊犁將軍摺內稱西安鎮標弁兵應照乾
隆四十六年奏案仿四川成都將軍設立軍標統
歸西安將軍管領府君議以滿城管緣營勢常不
及必至漫無約束成都將軍原轄建昌松潘土兵
未可援以爲例嘉慶十六年西安改設鎮標卽因
弁兵多事非紛更也且現在滿營弁兵數已在七
千外游手而嬉官吏幾不敢問乃又益以綠營千

餘員名非漢官所轄而又聚處漢城他日街市橫
行後患無已改設軍標大不便富公韙其言仍以
西安鎮兵一千名歸撫標六百餘名歸城守營以
神木營副將與城守營叅將對調並添設營弁如
府君議會銜疏陳

上是之尋點收撥兵府君以新兵入伍多懷疑畏示營規
六條一新舊官兵宜敦和睦一兵丁錢糧各予界
限一操演技藝宜省煩苛一擡礮擡鎗奮勉加演

一原標工匠照舊分撥一三營兵馬錢糧分營管
理示出弁兵咸悅事既定固原提督咨稱欲以冬
春駐劄省城卽以西安鎮總兵衙門改爲提督行
署府君持不可因詳致總督書其畧云提軍來咨
擬冬春分駐長安並函屬飭司議定以總兵衙門
留爲駐劄之所星沅按之地勢揆之人情稽之檔
案律之時事實有必不可行者查固原州東路咽
喉地方緊要舊設提督駐劄自乾隆二十九年始

議移駐西安以河州鎮駐固原至乾隆四十六年
大學士公阿桂奏明固原近踞六盤最爲扼要請
仍駐劄提督旋由軍機大臣覆稱該處距蘭州西
安均不過六百餘里呼應兩省可通而西控秦鞏
北連延慶皆有指臂之使應如阿公所奏仍令提
督駐劄歷年久遠成效昭然豈能遽爾更張故違
定制其不可行一也西安地居腹裏將軍巡撫近
在同城南北兩山均有重鎮比年年豐人樂兵民

相安亦斷無意外之變何必無故自恐忽爾張皇
就使備豫不虞提督由山路徑達並非控馭遼遠
鞭長莫及其不可行二也現議西安裁鎮原以地
方敕謐非伊犁邊要可比撫綏彈壓必無他虞始
經議准改撤若必提督分駐則青黃不接之時山
內恐有蠢動勢甚岌岌方設鎮之不暇而以裁鎮
入告豈非自相矛盾其不可行三也提督體制較
尊於總兵某公位望更尊於提督若常年分駐一

往一來其僕從夫馬供帳沿途州縣必不暇給卽
西安行署粉飾鋪墊支應等項兩季之久從何取
資其流弊殆不可問其不可行四也且游匪滋事
未必適在冬春設夏秋有警又將如何其不可行
五也來咨仿照湖南四川葉爾羌分駐半年之例
以爲藉資彈壓不思湖南辰州爲苗駐也四川雅
州爲猺駐也葉爾羌叅贊來往喀什噶爾爲回駐
也西安非苗非猺非回情形迥不相同何能援以

爲例且提督只有駐劄省會而至邊要鎮壓者未
聞有駐劄邊要而至省會鎮壓者輕重緩急之間
殊未權衡盡善其不可行六也富公然之議遂已
八月監臨文闡寬嚴得中士林感頌二十四年甲
辰三月疏陳遵

旨籌議仿鑄回錢事宜其畧云竊臣承准軍機大臣字寄
道光二十四年正月初九日奉

上諭回疆所用當五當十普爾錢文行使多年頗稱便利

聖主利用便民之至意又附片奏云再查回疆當五錢重
一錢二分當十錢重一錢五分較之寶陝局每制
錢一文重一錢二分每鑄錢一串費銀一兩二分
四釐六毫卽以現行十二卯改鑄每一大錢工費
遞加計常年成本總可撙節果能民用不滯圜法
自見疏通臣故於難行之中力求試行之要無如
沈思博訪累月籌商將由陝省試行有第見其難
而未見其可者敢再爲我

皇上陳之凡論鑄大錢者必重其本而精其工如當十之錢以制錢七八文爲之庶作僞者無所牟利然私鑄雖可少戢改鑄又覺徒勞是有更張之名而無節省之實若專主惜費意存苟簡勢必奸僞叢出錢法混淆重幣等諸無用此鑄之難也陝西商賈販運陸路由潼關商州水路由興安漢中川楚河南接壤最近若大錢止行於陝貿易所往輒窮虧折滋虞羣相觀望甚至預擡物價如唐代虛錢之

弊小民日謀升合又恐錢文攙雜較多嫌少致起
爭端此銷之難也大錢初行官庫必兼收放聞回
疆歲納棉花錢卽用普爾交官若陝省正雜各款
亦準此上庫則當五錢二百二十文當十錢一百
十文卽作制錢一串照例抵紋銀一兩一錢錢曰
盈則銀日絀正支撥項諸非所宜此例價折收之
難也若準市價收放而陝省銀錢隨時長落各屬
參差不齊上司無從考核卽定以大錢若干作銀

一兩亦不能與市價相伴勢必銀價賤時納者不肯納銀價貴時領者不肯領此市價折收之難也至搭放大錢除文武養廉夫馬工料而外兵餉實爲鉅欸回疆率由舊章相安已久若陝省兵丁每名月領幾何驟令按成折給錢雖重而用尙輕物力維艱生計頓絀不足以示體卹此兵餉搭放之難也臣嘗考之前事揆之羣情權之出納竊見普爾錢文陝省仿鑄不易必不獲已而由外之內漸

次推行或可相機酌辦臣不敢以創始之舉過事拘牽尤不敢以畏難之嫌稍存遷就仰維

慈訓總期利用便民流通無滯既有滯於民用之處謹再附片縷陳事中止五月神木縣招解李蘇氏李述秀毆斃幼女李春孩一案原招稱李春孩見賊偷菓在園聲喊無服族人李蘇氏李述秀往勸因伊幼子隨摘樹菓李春孩復行囑罵李蘇氏等氣忿各用木棍毆傷李春孩身死假裝自縊等情將李

蘇氏依鬪殺律擬絞李述秀擬杖八十徒二年府君以李春孩年幼無知李蘇氏等有何忿憾必致之死且李蘇氏等一男一女何以同向菓園同毆裝縊旋廉得李述秀與李蘇氏有姦是日爲李春孩撞見遂起意致死滅口先後用鐮柄將李春孩毆斃各情李述秀改照謀殺造意律擬斬監候刺字李蘇氏依從而加功律問絞以神木縣知縣玩視重案劾落職疏入奉有審訊精詳甚屬可嘉之

諭尋奉

旨議敘加二級因疏謝遂論治獄其畧云伏念準情定律
國有常刑斷獄持平法無倖免世俗不察乃有救生
不救死之說而回惑深又有失出無失入之說而
趨避熟情未得而先喜罪無疑而惟輕甚至供證
無憑承審不實或附詳記過或照例開叅視若故
常共相容隱水懦民玩犯者必多節經欽奉

諭旨

訓飭嚴切誠以止辟之義卽爲好生之仁臣賦質庸愚受

恩深重抵陝以來凡遇各屬讞牘兢兢以情真罪當四字

隨時告戒就案指駁而積習因循挽回不易卽如

神木縣李述秀等一案臣已先據縣詳批令再行

研訊仍至草率成招必俟解省後委員審明改擬

督飭不力此其明徵清夜循思方滋愧懼渥荷

丹毫示獎復蒙

優敘特加仰

異命之重申倍難安於蟻惻疏入

上是之二十五年乙巳正月奉

旨調補江蘇巡撫候代四月

陞見北行次山西靈石縣奉

旨暫署陝西巡撫折回西安視事時以總督惠吉公因病
開缺巡撫鄧公廷楨往權篆也訪拏青蓮教首匪
蕭剛張利貞鄧三謨等悉獲之究出各省匪名甚
眾並察知教首李一原分途密遣傳徒惑眾等情

匪夥蔓延已廣後各省緝拏得以首從悉獲者皆
府君力也十月卸事入都

召見八次十二月抵江蘇巡撫任到任疏入奉

硃批朕看汝年富才明學優品正甚有厚望於汝諒汝必
能體朕用人之苦衷也欽此江蘇政務繁難疲敝府君
極力振刷興利除害常若不及蘇松漕糧甲天下
訪知花戶自分大小完數遂有短長致不肖衿監
包攬小戶短交肥己且於經造一役詭名朋充爲

肆刀抗計漕務遂大敞銳意禁革之時常熟縣有
在籍知縣及武舉數人被控朋充經造攬納錢糧
特疏劾革審問罪如例並疏陳漕務情形其畧云
江蘇漕務積弊日深近年銀價極貴糧價極賤辦
理尤多掣肘卽如糧船幫費爲數不貲州縣旣須
津貼以全公勢必浮收以濟用於是刁生劣監乘
間把持猾吏奸胥藉端影射以至左右臧獲罔不
惟利是圖縱有精明強幹之員以一人之耳目心

思防範萬難周到而流弊所極遂有衿監包攬索規朋充經造之事查蘇松糧戶以富豪強梗爲大戶鄉曲淳良爲小戶州縣收數卽視此爲短長大戶愈占便宜小戶愈受苛刻於是小戶效尤亦詭寄於大戶大戶又多方包攬短數代完甚至虛收掣串另給漕規稍不遂欲非逞刁京控卽恃厭閑爭從此大戶日增小戶日減而漕事不可問矣以常熟一縣而論現在大戶已將十分之九小戶不

過十分之一州縣受制於劣衿而取償於弱戶此
盈彼絀剝肉醫瘡民固力不能支官亦利非入已
此衿監包攬索規之情形也各縣起運漕糧多者
八九萬少亦三四萬尙有地漕各項銀兩一切推
收過戶查造徵冊分散由單等事向皆委之經造
本係在官人役應由書吏選充乃年復一年大戶
欲廣包攬之權因而詭易姓名串通書吏朋充指
單浮勒無弊不作卽遇水旱偏災其應徵應緩數

目亦復高下其手每至兌開緊迫及

奏銷屈限之時止將短數交官所收加貼甚多早歸
私橐旣以窮黎之膏血如取如攜復以

天庾之正供或盈或絀州縣欲顧大局不能不東那
西掩卽賠累皆所不計名爲墊辦實易侵虧此又
矜監書吏朋充經造之情形也總之蘇省漕事繁
重百弊叢生各屬大畧相同而常熟一縣爲最
渥膺

重寄蒿目怵心自當振刷積疲力圖挽救所有本年起運
新漕臣於莅任後卽經諄飭該州縣等秉公籌辦
白規固宜禁止朋充尤應革除務期一律均平不
准再有大戶小戶名目庶幾民困漸蘇而幫費有
著重運不致遲誤至此等積蠹刁衿論法原無可
恕而積習已久誅不勝誅惟有遇事嚴懲去其太
甚斷不敢操切債事亦不敢因循害公以副

聖主整肅漕儲綏靖閭閻之至意疏入奉有寬猛相濟勉

力爲之

諭南河總督潘公錫恩具奏籌備空運事宜並請定松江重運渡江限期一摺奉

旨會議府君詳議覆奏其畧云松江重運幫船向與蘇屬各幫糧船跨兌必先蘇而後松又由吳淞黃浦泖湖運河迤邐出江連年比較遲早不過數日從無延誤此時若另立一限刻期渡江亦只上緊催趲別無求速之法查渡黃

欽限務於四月初十日以前全漕抵壩各省漕運凜遵歷
有年所近因漕務繁重幾成具文果能節節提前
漸歸初限實爲萬全無患所有松江重運相距不
遠尤當爭先恐後一律遡速率由舊章趕符渡黃
欽限其渡江日期自可不疾而速應無庸另立一限以歸
簡要臣等惟當先事籌度嚴切督催俾漕米及早
兌交糧艘及早開運如縣幫稍形玩易立即指名
撤叅刻不容緩務較常年提前辦理有速無遲以

冀勉紓

聖主厘念漕糴之至意議遂寢初戶部奏准有漕省分官員捐米章程上年復經奏奉

諭旨籌辦原奏內有現議招商海運一語府君以江蘇地處海隅現值銀貴錢賤糧價平減因飭上海道縣議行招商事宜旋有商民王學敏等願備價收買米五萬石運赴天津銷售爲給照免稅並咨直隸總督示諭該處米行按照市價糶賣尋運行有效

識者以爲裕國便民莫善於此江蘇民欠未完及
因災緩徵銀米截自道光十年至二十年止欽奉
恩旨一律豁免府君因查得積欠案內各州縣墊完民欠
銀米兩項合銀二百五十萬有奇無從徵還以實
係官墊並非官虧並懇

天恩通豁因疏言欠在民者旣普

恩施墊之官者亦早充國用本在豁免之列名異實同徒
爲賠補之繁損多益少如能一律豁免庶州縣咸

與維新小民各得其所以揣本以齊末亦截流而
清源云云報可四次清查一案欵目紛紜辦理頗
多轆葛府君悉心叅酌就上屆三次成案量爲變
通條列四事其畧云一在畫清界限州縣正署迭
更多者十餘員少亦數員不等誠恐不肖者藉此
清查或將本任之虧缺諉諸舊令未交或將前任
之實存作爲現在籌墊非清界限不足以杜牽混
也一在根究侵虧州縣身任地方潔已奉公者固

不乏人而假公濟私亦難保必無其事若徵存未解之欸而謬以爲民欠卽虧那緩帶之項而捏以爲分攤非究侵虧不足以防支飾也一在核實追繳州縣經管銀項如無侵蝕重情有著者照數勒交無著者始議籌補先以有官有人分起酌定限期現在服官本省者未經定案以前准其設法措完其已經離省與子孫出仕者亦於定案後一律限催歸欸非此則追繳無實際也一在杜絕續虧

州縣遇有交代例須倉庫依限盤清而積久弊生遂多有名無實於是原價移交者有之流攤列抵者有之議單欠票者有之前任既通融接收後任復轉相仿效應自道光二十五年起以交代爲盤查以二叅爲限制而尤以嚴提存庫使之無可騰那非此則續虧無窮期也如所議無錫金匱兩邑現年輪役爲民患久現年者以一圖之田分爲十甲以一甲之中田極多者爲正戶稍多者爲次戶

充當地總名曰現年地總其有矜監例不充役以
及不諳圖務者許倩人代辦名曰包總每年冬間
由經管糧冊戶書曰區書者開呈來年甲內正次
兩戶傳認來年地總區書出具保結認充入卯承
值圖內公事正戶支值六分次戶支值四分田之
多少以分釐分別正次積久相沿自嘉慶以來踵
增益甚輪充地總者凡圖內小戶抗欠漕米銀兩
始則著令地總協同糧差催追糧差到鄉責令地

總膳養名曰養差其小戶不完卽將地總按卯提
比羈禁名曰比總銀漕總書藉此愆愆縣令押勒
墊完大圖或漕米三五十石銀百餘兩小圖亦漕
米二三十石銀五六十兩墊完後將串內小戶歸
令索償大約墊完之中一半歸烏有而糧差催總
詐索又較催追花戶爲多地總畏其解比不得不
給所欲且如相驗屍場協緝盜賊差役捕役惟地
總是問至派養徒犯等務亦皆勒令賠墊自道光

十年後又於墊完小戶銀漕之外凡大戶未完銀漕復押令領串具限繳庫名曰差追實又押墊大戶矣其有包總脫逃仍惟正總是問而區書復舞文得賄將大戶提避別圖並爲分作數戶巧避地總之役專留次戶勒充其甲內不應輪總之小戶按田所出津貼役費輪總者不能熟悉區書又暗自婪收致現年輪總所墊之項一無取償故凡當現年輪役者中人之產立破以兩邑四百一十五

圖計之當是役者數百人一現年輪役必破數百家之產民共苦之兩邑紳耆屢經控訴上官隨時禁革旋復舊是以吏胥得志以爲上官不敢問害更烈府君蒞任卽札縣限日悉除之復斟酌差役義役均役之制令核區內田畝公舉地保官給工食祇令區內遇有事件據實開報糧差來圖切指的戶他無與有田之人僅清完本戶絕無累務使賦不隱漏課必如期戶皆自完役無旁及不復有

現年地總等名目復出示勒石永禁百餘年弊政
一旦盡革輿頌大作無錫二泉亭舊有四中丞祠
其始專祀明周文襄公而海忠介公周公鼐魯及
我

朝湯文正公以次而附兩邑民以府君神明果斷力
除巨患乃爲位入四中丞祠更名爲五中丞祠府
君貽兩邑紳耆書止之然已無及也江蘇保甲之
法日久廢弛特申嚴禁律嘗具疏論之其畧云伏

查江蘇地方沿江濱海水陸交衝五方雜處匪徒最易托足如上海之閩廣游民蘇松常鎮之土匪棚民淮揚徐海之埧匪鹽梟與跟隨漕船之水手青皮以船爲家之漁戶流丐防範稍疎每虞滋事全在地方官實力編查保甲講明守望相助之義嚴定容隱連坐之條庶小民各衛身家奸宄無從竊發臣於上年赴任時由徐淮揚鎮常五府行抵省城先將經過處所牌甲順道間段抽查尙屬符

合復通飭所屬凡匪徒出沒煙戶稠密之處均添
派文武員弁隨時偵緝又於陸路修葺卡房水路
添設巡船令與各汛弁兵聯絡聲勢無分兩夜按
段會哨總期法立令行不准虛應故事如僅具文
結報仍多盜竊或辦理不善擾累良民卽將劣員
指明嚴叅以仰副

聖主禁暴戢奸綏靖地方至意江蘇外海盜風頗熾府君
以辦理洋盜宜有專責遂會同兩江總督壁昌公

疏請責成蘇松福山二鎮巡洋捕治其畧云查巡洋責在水師督捕尤資專閫蘇松鎮總兵林明瑞係統巡江省外洋之員盜船由浙來江必不能飛越汎境福山鎮總兵孫雲鴻係統巡內洋之員聲勢亦極聯絡核該二鎮夏季巡洋船隻共大小三十一號配載官兵一千餘名兵力已不爲薄雖盜船乘風來往厯無定蹤而江浙交界之陳錢馬蹟大小羊山等處水深澳廣洋匪每向泊船卽係林

明瑞水師應巡之地現當盜風初熾亟須上緊截
拏_臣等與提_臣迅密函商擬令林明瑞以巡洋爲
追捕駛赴陳錢等處搜查有無盜窩及盜船寄泊
又令孫雲鴻以巡洋爲援應相機行駛遇有盜匪
速卽合力扼擒否則各巡各洋不准仍蹈積習徒
以探明盜蹤再行請調兵船會捕藉詞延宕至巡
洋船隻甫於善後案內經林明瑞等核定大小數

目稟由

_臣

璧昌

奏准辦竣更不得以兵船不敷率請雇募商船致滋
擾累仍由臣等遴委幹員分投會查如有沿海土
匪接濟勾結嚴密拏辦卽責成廳縣營汛督率兵
役地保晝夜瞭探見有盜船游奕或當水師追捕
飛稟飭拏倘敢乘隙登岸刻速堵截擒解並將巡
洋兵船實在有無過境按五日稟報一次以杜欺
飾如議二十六年丙午六月會同總督疏陳遵

旨飭查邪匪誑毒幼孩實無其事府君以正摺意有未盡

因附片縷陳其畧云人情厭常喜新每藉不經之
談侈爲不刊之論道聽塗說以訛傳訛而其害中
於地方其幾伏爲事變唐臣韓愈有云甚矣人之
好怪也不求其端不訊其末惟怪之欲聞誠慨乎
其言之也如本年夏初浙江蕭山縣義橋臨浦等
鎮偶有幼孩暴卒之事因之傳單四布遠近譁言
江蘇各屬城村羣以邪匪誑毒禁食糖果而窮簷
小本貿易以糖果爲生業者遂以終日不得一錢

蚩蚩者輕去其鄉人地生疎輒謂形迹可疑橫加
搜詰甚至叢毆以後再行緝送經府縣當堂研試
共信無他一面嚴禁妄拏出示開導令各安居樂
業毋爲浮言所惑民心始就帖然至六月中旬又
傳浙江上虞縣有睡中迷魘者有聞腥風發暈者
有紙人夜出攫食暗剪雞毛者及委員分途確查
則仍絕無其事此必前說已窮更易一說以新耳
目非奸民乘機恐嚇圖便穿窬卽游民好事播揚

憑空結撰以尼山所不語致鄭人之相驚如蝸如
蟾爲鬼爲蜮臣等愚昧之見竊以事難理喻惟在
主乎其常妖由人興尤必鎮之以靜雖採生折割
幻術何窮而乍見惻隱良知所共果有邪匪誑毒
直省風行地方文武各官非喪心病狂當不忍爲
諱匿且此項邪匪旣將伐掘於其死何不拐騙於
其生又安知毒斃之見其心肝腦腎卽探囊而取
耶又能禁被害之家皆箝口結舌不一鳴之官耶

現在比戶相安前說盡息仍由臣等嚴飭各屬隨時隨地認真設法廝訪其查辦不力稍涉粉飾者卽行指名撤叅惟以有無報案爲憑一切無稽之言相戒勿聽蓋風會邪正之判人心動靜之機隱繫於此不敢不深思熟慮謹再據實縷陳奉

硃批今夏京中傳聞此說朕早洞悉卿等不知耳欽此禮部奏准各省彙題節婦查明何縣人氏應隸何府州廳所轄統計節婦共若干名卽於各該府州廳

內官爲總立一坊府君以總坊建立府城所屬鄉民無從徧喻不足以昭激勸因疏請將江蘇省各州廳縣查辦節婦由地方官於本境內擇地建立一坊大字標識庶閭里之間往來屬目尤足動人觀感如議行荆溪縣詳解民婦大張盧氏誘媳小張盧氏同陷邪淫不從非理棒毆致自拉棒傷斃一案按律小張盧氏合淩遲處死府君以誘媳於邪大虧姑道與尋常逞兇干犯者不同特申明請

旨尋得減死省城水門弁兵向多詐索商船水販苦之又俗尙唱演花鼓男女羣集輒經日夜又有無賴者陰持地方官及殷實紳商短長藉端詐索俗謂爲搭臺訛詐皆就案重懲之九月奉

旨補授雲貴總督因回務急有馳驛之

命十一月抵滇先是緬寧大小猛統地方有回匪馬懶海卽黑牙齒者糾黨千餘人藉口道光十九年客民械鬪之嫌於十月十五日闖入緬寧新寨強搶仇

殺該管騰越鎮總兵李君能臣奉提督劄飭委赴順寧旬日未行府君以兵貴神速甫受篆卽疏劾之並飛催提督赴順駐劄復飭按察使出省策應一面飛調官兵一由順寧前路徑入一由緬寧後路抄出均歸提鎮調遣以備夾攻十二月匪黨聞官兵將至同時散匿汎兵鄉練間有截殺適雲州稟報該州奉文處決回犯馬子鳴易懶亮二名未及行刑突有回匪馬登宵海連升等率黨百餘人

持械劫奪以去府君偵知緬寧回黨聲息相通意在勾連抗拒老我師也急檄提鎮以後路官兵仍於雲緬附近分紮飭將前路官兵迅赴雲州各回寨出入總口層層布置傳諭寨民等指拏前劫重囚及商同劫囚並緬寧滋事逃匿各犯以寨內良回頗多不忍遽加駢戮嗣回寨抗命逆情顯露乃飛催將領帶兵進攻凡樂黨州街象山三戰並各路防兵遇賊接仗十餘次先後擊斃賊目海老陝

等十餘名夥匪六百餘名生擒茶五十六等三十
餘名軍威甚盛該寨文生張大文武生馬聯霄回
民馬世瑞等叩營乞恩將所刼囚馬子鳴等二犯
細獻府君復授計順寧文武乘機設間縱令馬聯
霄等歸寨凡兩次細獻馬世寶等十餘名前後隨
繳銅礮鎗矛百餘件在事者遽請旋師府君以首
逆未擒督剿益力於是首逆馬欄海馬登宵海連
升及前經投誠復叛之馬效青卽大白象生致軍

前正法梟示又叛回張富傷斃檢驗得實施搜除
餘匪解散脅從緬寧一律肅清乃撤兵歸伍時二
十七年丁未正月也是役也調用兵練五千餘名
餉糈十餘萬未及三月卽蕆事

成皇帝嘉之

賞加太子太保銜

賞戴花翎以示優獎府君擇在事出力者加考疏薦自臬
司總兵以下蒙

優敘有差降調總兵李君能臣仍獲開復威府君公明至
涕泣其軍務不力者劾罷之熟籌善後事宜設立
通省團練章程嘗具疏上陳其畧云此類踪跡靡
常所在多有固不忍禽獮草薶更無從埽穴犁庭
若以小醜跳梁動輒勞師糜餉於理似爲不值於
勢亦有所難若期簡易可行莫如團練之法入自
爲衛農卽爲兵寇至則修我戈矛寇去則入此室
處無調發支給之擾無跋涉轉徙之煩不必伺其

方來而常存戒備不必極其所往而各固藩籬以
治匪而不勞以輔兵所不逮計無便於此者

臣

已

疊札通飭諄諭地方官認真董勸實力奉行因地
因時相保相助務有裨於邊備而無藉於軍需其
夥黨較多情節較重者仍卽會營稟商籌剿不准
諱飾姑容久之漢回協和聯爲一氣游匪無所托
足或亦化莠爲良之道又疏論漢回情形其畧云
此次剿辦雲匪

臣

揆度機要內回富而外回貧外

回強而內回弱與其濫殺而動滋藉口何如密計
而先務攻心果能奮勇出奇全力制回卽可以回
擒回並可以回擒匪旣破護夥之習兼示殲渠之
威且日後報復無所歸怨自雲州外如順寧之狗
街右甸永平之曲硎新村蒙化之漾濞圍埂向皆
匪徒出沒之所趁此兵有餘勇賊有懼心自應分
路搜擒嚴加整頓又前次緬寧股匪逃入猛統地
方旋卽聞風散匿仍飭確切偵探密速堵拏雖蚩

氓反覆何常積怨衅端易啟未必因此一舉遂就
帖然惟當非種必鋤無稍姑息使之有所畏而勢
不逞並有所忌而黨不堅似可漸祛惡習

臣

故曰

治回必先治匪匪不治則回不治卽漢亦不治也
邊郡不知有法由來久矣方今亟務莫如執法莫
如持平以執法漢回同體犯則重懲如治亂絲必
徐爲理如束急水必大爲坊準除暴安良之施絕
欲速見小之弊慎選文武責成公正保甲以清內

匪團練以禦外匪各路嚴巡卡以杜匪之往來各
廠嚴簿籍以防匪之出入庶於元氣無損而於大
局有裨均奉

諭獎勵督滇黔五閱月中間兩署巡撫一署學政軍書旁
午三印兼權諸事畢理四月奉

旨調補兩江總督疏請

賞假十日便道省親奉

硃批照卿所請欽此五月抵長沙白癸卯擢撫關中陳太

夫人就養官署及總督雲貴太夫人以道遠多瘴不欲赴遂歸長沙至是得旬休稍申依戀仍以道遠未敢迎養六月抵兩江總督任到任疏入奉

硃批一切盡力爲之以副朕得人甚難之苦衷也欽此初受篆先行巡視沿江礮隄閱官兵申明紀律於署內箭道仿作田塍小路就省標分起傳操施放連環鎗礮以期便捷凡三省營員因公來謁者咸面試弓馬察年力爲舉劾因選輟罷斥者甚多其技

藝過人者驟加獎擢會特疏以遊擊武迎吉越升副將守備毛正和越升遊擊爲營員勸捐納把總人員補缺部行成例到標後與在營兵弁較拔二人後用捐納一人府君以此項人員三缺補一未免過優且未定効力年限殊難挨班序補因請仿照捐納營千總之例以到標効力一年期滿之日起遇有把總缺出先用在營弁兵七人武舉一人後用捐納一人蓋九缺得一也至今遵之營制有

不便者熟籌易置京口副將駐劄江陰縣城所轄
京左右營分駐靖江京口府君以江陰城外驚鼻
嘴地方爲長江第一重門戶江陰營兵無多有事
猝難應敵因查高資營都司額兵五百餘名本屬
京口協營分駐原駐丹徒之高資港從前濱臨大
江上援省城下應鎮江地勢頗爲扼要近沙洲疊
漲高資港卽在便民河內安處腹裏并無汛地分
防乃疏請將高資營都司移駐江陰旋以更改營

制務期盡善復由江陰移駐北岸靖江縣作爲京口協標左營都司其原駐靖江縣之京口左營遊擊移駐江陰作爲京口協標中營遊擊其高資營千總作爲高資汛千總歸京口協標右營遊擊管轄其餘弁委汛地隨營布置江防益加密焉外海水師久不振自總兵以下叅劾尤夥曾附疏陳營務情形其畧云江省營務近年稍覺改觀而弓力之等差鎗箭之準頭演礮之架式就省標而論仍

未能勁悍過人將備中出色之員亦不多覲或以

南方風氣柔弱爲解

臣

思時代不同風氣無異遠

自漢晉多以江東兵雄長中原近如明

臣

戚繼光

亦用浙江溫處兵禦倭有功南方豈盡柔弱我

國家承平日久民不知兵復以吳越秀良重文輕武

軍旅之事漸少脩明幾爲當時通弊水師不振殆

又甚焉蓋內洋外海風雲沙線之辨頗少傳人舉

凡師船礮械按月巡哨向多視爲具文一有盜劫

之案輒先妄指洋圖展轉推諉卽令總兵督緝將
弁稟報出洋或某日擊碎盜船或某日轟斃盜匪
汪洋大海誰實見之雖不盡屬子虛所言殊難憑
信現當水師緝捕喫緊經臣咨會浙省相機合辦
並與撫臣捐廉籌費遴委幹練文武水陸分投疊
札指示飭遵海隅窩頓必清海岸接濟必斷其寄
棧有所必確探以跟踪其出沒無常必擇要以截
擊新造大舳舫板互換油艙量爲津貼加工舊設

哨弁巡丁例給口糧復爲破格懸賞總以生擒盜
犯起獲盜賊爲憑或提訊夥黨或解驗傷兵或質
證船戶必得有所徵驗不准虛報邀功務與陸路
各營一律認真整飭旋會疏陳整飭章程其畧云
伏查水師出洋首重船隻江蘇外海九營所轄洋
面遼濶向止舫船十二隻臣等先務爲急現議勸
諭紳商捐造添補應用另摺具

奏惟船備而鎮將不力弊仍與無船等而鎮將之所

以得力又在湔除積習鼓舞新機當因者因當革者革調度固需臨事巡緝亟應預籌臣等體察情形悉心妥議謹擬言之必可行者約舉數端敬爲我

皇上陳之一人才宜磨勵也江蘇風氣柔弱水師尤難得人近年洋盜未清從不聞兵船在洋接仗之事經臣等疊次指叅庸劣不堪之鎮將分別革職枷號並派文職大員督辦各營始知儆畏勉力出洋而

昏暈嘔吐無狀不備又經汰其已甚獎其稍可革
除陸兵名目專從水務取材數月以來畧有起色
如署叅將劉長清遊擊黃登第等先後擊沉盜船
擒獲盜犯救回被劫商船皆近來所未有惟全材
甚不易得要必舍短取長明定賞罰優者破格示
獎劣者加等示懲駕馭而鞭策之令其知感知奮
一營巡宜變通也蘇松福山兩鎮同爲外海水師
而蘇松鎮常年統巡外洋秋冬兼巡內洋福山鎮

僅止春夏統巡內洋秋季會哨一次未免勞逸懸殊應從道光二十九年正月爲始蘇松鎮春秋統巡外洋夏冬統巡內洋福山鎮夏冬統巡外洋春秋統巡內洋狼山鎮本係陸路總兵統巡有名無實其輪巡外洋官兵應聽蘇松福山兩鎮調度考核並南漕營都司守備應與蘇松鎮標中營等六營一體輪巡外洋以資練習一會哨宜核實也定例蘇松鎮總兵與浙江定海鎮總兵又蘇松狼山

福山三鎮總兵及各營將官按期互相會哨立法
未始不善近年則該鎮將均止派弁由陸路取結
呈報彼此並未謀面遇有盜案懦者懵然不知黠
者藉詞推諉實爲水師大弊節經_臣等咨會浙江
撫_臣並通飭江蘇鎮將必須親往巡哨一遇盜船
相機兜截另派幹練委員輪駐海口明查暗訪如
再虛應故事立即密稟核叅徇隱同罪一堵緝宜
扼要也現查江蘇外洋柰山最爲喫緊_臣等遴委

叅遊一員帶領兵船在彼寄碇按季更換如值該員巡洋之期卽作爲過班遞推派調其統巡之總兵除隨時遊巡外常年寄碇崇明縣之黑沙嘴稽查策應倘仍收泊內港一經委員查出嚴叅枷號示衆一配兵宜足數也原定舢船一隻大舢板船一隻各配兵四十名小舢板船一隻配兵二十名棲宿時形擁擠偶值追逐洋盜技勇亦頗難施以致派不足數臣等上年冬間廉得其弊因核定大

舳船配兵三十六名大舳板船配兵二十四名小舳板船配兵十六名無論內河外海一律照派試行尙覺相宜嗣後舊有船隻應卽照此派調仍俟新造加寬加長之船工竣再行酌辦他如沿海接濟必先杜絕而後盜糧無可資下海私船必先查禁而後盜蹤無可假以及海口人戶俱照內地編查保甲藉清勾結而免窩藏一切應行事宜屢經臣等照案諄切通飭無庸另議更張至海岸捕盜

之方誠如

訓諭必以不分畛域認真兜拿爲上策而畛域各存意見
非獨隣省難於兼顧卽本省界限亦有專司幾至
牢不可破此次通盤籌畫本省隣省總期一力巡
防聲勢聯絡分捕合捕責有攸歸守之以嚴行之
以實不敢侈言成效尤不敢稍襲虛文以冀仰副
聖主綏靖海疆之至意旋籌捐戰船四十餘號配兵巡緝
擇水勇出力者疏請拔入水師如外委額外兵丁

由外酌補以示獎勵擊盜殞命之弁兵民舵特請
照陣亡例給予卹典以資觀感於是人人思奮水
陸營務一新捕務大振其時蘇州松江太倉三府
州起運漕白糧米改由海運循案派兵一千名防
護前進凡運船八百餘號連艘迅達盜踪匿迹識
者多歸功於舟師嚴整云淮北改行票鹽著有成
效淮南課額較重銷數易虧歷年無起色府君訪
知引滯課絀情形乃分別因革事宜酌議章程八

條其畧云一運庫正雜商課絲毫均關要款當此
慎籌

國計尤宜撙節實存嗣後額解額支應查照各藩庫
於動放時專案報明備查其無定活支等項不分
銀數多寡均查明原委按款具詳由臣核准飭遵
不得先行動放以憑斟酌刪減一近年辦理折運
收數較少放款仍多必得量入爲出現飭運司及
早預籌除運庫實存銀數之外計今歲秋單來年

春單應完商課是否足敷支解如有不敷卽將節
年緩課飛咨楚西鹽道趕緊提回併本年懸引緩
納課銀飭商就近在揚完繳毋許延欠一楚西引
鹽厯派綱商認辦其有倒歇退懸之引始准酌派
招徠近日率多化名規避辦運有一商化作十餘
名者現查丁未新綱虛懸三萬餘引又厯綱積存
已派未認十四萬餘引應將捏造假名一概刪除
禁止所有朦退引數均歸各本商名下認回照辦

其實在無著者酌派通河各商至厯綱未認積引責令已派各商納課投請如有違混卽照商欠鹽課例從嚴追究一淮商重運引鹽自完課請票以至鹽船開江凡管鹽各衙門給發官件如印本銀票引單底馬桅封水程之類名目甚多需索勒捐諸弊卽由此起大爲商運之累現與運司熟籌應裁者裁應併者併務使刪繁就簡直捷易行一切公件隨到隨辦毋許牽掣延阻如有胥吏把持需

索嚴提究懲一楚西兩岸歲約銷鹽八十餘萬引而折實留運止六十餘萬引是運足新綱之外尙可帶銷二十餘萬引應自丁未綱起飭令各商將額派引數趕緊納課發重凡請運新鹽一千引配運殘鹽三百引不得先儘殘鹽請辦其寧國上江等食岸融楚者本係輕則之鹽運銷重課之地未便轉爲佔壓擬俟新綱運竣再准請辦一湖廣存鹽計引不下百萬前經

奏明以三百萬包爲一檔按到船前後逐檔銷賣惟
先銷積引似與丁未新綱有礙不能不酌中通變
卽擬咨商湖廣督臣每於一檔之中將鹽船到岸
停泊兩年以外者先提一百二十萬包兩年以內
者先提一百萬包新綱運到先提八十萬包仍以
三百萬包爲一檔均勻派賣毋許爭先搶跌亦不
准高擡價值自阻銷路一查淮南巡費每年所需
甚鉅從未得收實效今擬酌留走私各要隘照舊

派巡其餘一律裁撤卽以所省經費收買竈鹽使窮丁得有口食不致偷賣濟私仍飭商配搭捆重按引扣還接濟至州縣營汛本有緝私之責查獲私鹽變價充賞不准因裁除巡費稍爲鬆勁如有底縱分別叅究一鹽船淹消自道光十年奏定止准補運不准免課迨後查有行舟實係遭風失險者復經

奏明量爲矜恤近則報案疊出甚至到岸停泊亦報

淹消虛捏必不能免卽就補運之數約計每年三五萬引積少成多綱引亦形佔礙嗣後停泊鹽船呈報淹消概不准免課補運船戶盜賣之引追贓給領亦不准免課其在大江行駛猝遇風暴失事經地方官勘訊屬實仍隨時酌准以示區別回空漕船夾帶蘆私頗礙綱鹽正引特疏請嚴禁其畧云竊查江廣各省軍船由通州交卸歸次丁舵水手每因蘆鹽價值賤於淮南勾串風客隨幫販運

盈千累萬除本分肥甚至梟匪入夥肆行無忌大
爲淮綱之害伏讀道光十年欽奉

上諭軍船帶私之弊以江廣爲最其透漏鹽觔之弊以天
津爲最與其搜獲於旣帶之後不若嚴禁於未帶之先
等因欽此嗣據前督臣陶澍節次奏奉

諭旨通飭查辦歷經照舊遵行惟近日淮南綱鹽漢西各
岸銷數益形短絀年復一年其受病不止帶私而
帶私尤著卽帶私不止空運而空運較多聞天津

鹽商利於售私糧船停泊時在公埠交易其附近
天津地面如青縣靜海滄州南皮等處臨河商店
亦多私鹽窩留專候迎船上載不於此首先禁絕
若輩既費資本護私必堅來源未清去路叢雜淮
網壅滯疏暢愈難卽空運沿路遷延展轉售賣於
漕務極有關係相應請

旨勅下長蘆鹽政嚴切示禁各場店於軍船回空例買食
鹽以外不准顆粒運售有犯卽懲以杜夾私之由

臣仍飛咨漕

臣

加意嚴查防範不准弁丁勾結稍

有夾帶並咨會直隸督

臣

山東撫

臣

檄飭沿河營

縣一體堵截查拏俟入江南地界

臣

卽選派文武

大員迅速迎查兼防河北透私並於揚莊勾水起卸渡黃後自揚州駛出瓜口沿江洲汊各關隘逐段搜查務盡勒催儼行以期仰副

皇上厪念鹽漕之至意又念淮綱銷路莫大於楚西尤莫重於漢口時鹽船停泊數以千計鹽租存岸數以

三四千萬計佔閣運本不少固由銷路未暢亦商私販私腳私諸弊有以致之因會同湖廣總督裕莊毅公籌商合緝事宜疏畧云伏查淮南綱引疲滯積漸使然其大端在銀貴錢賤緣岸商以銀交易水販以錢零售就近日銀價而論每銀一兩兌錢二千文比之道光初年已增一倍小民錙銖計較勢必貪賤食私因而私鹽易侵銷數易絀截至上年十二月止湖廣存鹽七十餘萬引江西存鹽

二十八萬餘引加以在揚未運約共幾及三綱或
謂減價敵私可冀疏銷存積第現在漢岸價值每
包售銀二錢三四分每觔合錢五六十文較例價
二錢九分五釐所減已多卽照往日售價二錢六
分零復有減跌而銷數仍未加暢是減有本之岸
價不敵無本之私鹽惟有嚴加緝私實爲目前要
務查楚岸地處腹裏粵私川私潞私票私腳私四
面侵灌占礙銷路不可勝數節經

臣

裕泰委員分

赴邊界巡查訪拏窩固梟販不遺餘力各州縣考
核功過總以銷鹽暢滯獲私多寡爲憑現又派委
文武大員酌帶兵役在於走私要隘上下查緝並
於鹽船經過之武穴及泊船之塘角地方添設卡
巡盤驗辦理未嘗稍懈至場竈透私之所首當設
法清釐臣李星沅先後委員勘明水陸隘口扼要
堵巡並飭分司場官督率竈頭竈長逐日稽煎填
註火伏務令鹽盡歸垣不准顆粒透漏其儀徵改

捆均經嚴飭同知大使等親赴捆場認真掣驗查
禁買硃放勛預防腳私夾帶仍實發江船水腳於
船旁烙印查驗分別究懲迨由儀徵出江復飭各
岸營縣逐層列卡盤查並專委京右奇兵兩營遊
擊總司江面巡緝向來淮揚一帶幾成販私淵藪
自上年九月起獲貴池官運私鹽一百十五萬餘
勛

奏叅嚴審並陸續拏獲鹽犯三百餘名私鹽七十餘

萬飭有已審擬軍流咨部者有批飭審辦尙未定
擬者數月以來臬徒稍知儆畏江西安徽湖南湖
北各口岸亦經臣等疊咨各撫臣嚴飭文武不分
畛域堵截梭巡能少一分私鹽卽多一分官引如
果奉行確實似於銷路有裨竊思淮南鹽務自歸
總督管轄今已十有八載中間或滯或暢整理多
方要皆變通於成法之中未敢紛更於成法之外
誠以有治人無治法法不敝而人敝之近因銀貴

錢賤累及全局則又時會所值不獨鹽務爲然若
欲另議更張動需歲月誠恐商情觀望轉致課餉
虛懸且恐銀價未平收效亦無把握臣等再四籌
酌惟有合力緝私徐圖補救督同運司鹽道申嚴
舊例參酌時宜遇事講求實心經理並飭各商趕
緊運銷以冀漸次疏通鹺綱日有起色萬一積重
難返實有應行變法之處容再

奏明辦理又疏陳江西安徽綱食引地分別整理事

宜其畧云查江西省額行淮南綱鹽二十七萬七千餘引所有行銷地面多與廣東福建浙江三省毘連淮鹽道遠價昂鄰私路近價賤每多越境充賺佔礙正綱如閩私侵入撫州建昌浙私侵入饒州粵私侵入吉安等府久爲淮鹺之害自道光十二三年前督臣陶澍等籌議章程堵粵私則有良口市等六卡堵浙私則有石港等十卡堵閩私則有許灣等十餘卡分委文武員弁嚴定功過章程

先後

奏明遵行頗著成效

臣

於上年復加考察原設卡巡

各路布置已極周詳聲勢亦均聯絡第所派佐雜

文員職分較小汎兵不聽調度卽經咨商撫

臣於

候補丞倅收令中遴員分別更替責令地方營縣

會同實力堵緝俾得呼應較靈惟南昌一府分銷

淮鹽十餘萬引而南昌新建二縣又分銷一府之

半該府屬地居省會戶口滋繁額引倍於他郡近

年益覺滯銷

臣

密訪所由緣儀徵江船裝載商鹽

向運至星子縣所屬青山地方收幫停泊該處濱
臨鄱湖距省較近江船剝船及划腳小船皆聚於
此非盜官引以濟私卽賣腳鹽以影射挖包改碯
過籠填艙種種弊端不可枚舉以致蔓延省岸銷
路愈難卽經札飭鹽法道熊莪親詣青山逐加釐
剔驗江船之艙口盤裝載之鹽包按艙剝空核實
見數以防夾私盜賣之弊江船向帶空包藉詞破

損更換偷爬改捆今改由自備禁止賣帶卽以原包交商照額稱收倘有輕短立提究懲以防偷挖改包之弊稽查剝船按數編號姓名籍貫書寫船旁卽船身之大小定裝鹽之多寡給發印票俾資核對其青山河划船毋許剝載以防過籠填艙之弊又如江船到岸浮費嚴飭革除以省擾累沿途派撥催儹責成員役以免遲留此查辦江西綱岸之情形也至安徽一省綱食相兼分銷淮南北引

鹽淮北票鹽售銷甚旺惟應行南鹽之安慶池州
太平寧國等四府屬近年銷市比之楚西更疲原
認各商刻思退避酌劑官運亦無轉機惟加意緝
私尙可從容挽救經臣遴委泰州分司運判許惇
詩前往勘明要隘添設卡巡務爲保衛藩籬之計
至寧國府屬旌德太平二縣溪灘居多運艱費重
民間買私成習亟應招徠水販分設子店於附近
灣汴地方領買商鹽運回轉售或由該岸商加貼

腳費或由各祠長約數分銷並嚴拏抽費縱私之
擔頭放債濟梟之匪徒札飭安徽藩司督同府縣
分別查辦仍咨會撫臣遴委文武幹員會督兵役
於安慶寧國兩府屬之天堂汎箬嶺等處駐紮巡
查務期有犯必懲以遏梟販此查辦安徽綱食引
地之情形也伏思淮鹽行銷六省湖廣之外江西
安徽引數亦多同爲

國家經費所關當銀貴錢賤之餘正私充引積之會

弊成於漸時際其難

臣

刻凜重肩敢不殫誠竭思

力圖補救仰副

聖主整飭淮綱之至意又疏陳新殘融楚勻配疏銷事宜

其畧云淮南課引繁重甲於天下歷來籌銷之法

固在緝私亦在輕本商本較輕轉運自便

臣

受事

伊始卽以此爲亟圖溯查揚州浮費前督

臣

陶澍

任內先後查辦凡可以節省者業已覈實刪除現

在科則列徵悉關京外餉需殊難再加载減計惟

修明成法隨時因革如刪併官件酌撤冗巡曾經
奏明飭遵無非輕本恤商之意閱今數月在揚新殘
未運引數猶及兩綱楚西存鹽合共百餘萬引與
臣前奏畧同商人資本無多深虞佔閣近聞籌議
補救不無觀望之思本年春單請運尙少據湖廣
督臣查明漢岸章程既無應行更張之處每歲岸
銷數目總在七十萬引有奇所有各商售出課銀
應卽趕辦後鹽陸續捆運由臣督飭運司認真體

察經理並將丁未上半

奏課照數催完依限造報未敢稍涉鬆勁惟准湖廣

督_臣咨會抽查塘角鹽船內有包硃不符及三船

短少包數並擬將殘引融楚暫行停減鈔錄片奏

前來_臣查包硃重觔藉備暑耗拋灑久之遂滋錮

弊而船戶盜賣影射愍不畏法幾至視若固然尤

當就案懲辦_臣於緝私一節疊經札飭南監掣同

知及沿途地方官上緊嚴密稽查不准畧有疏懈

至停減殘引融楚誠爲清釐積滯起見第查丙午
等年五綱推展減運原爲帶銷殘引地步據九江
關呈報上年過關楚鹽共止五十六萬餘引未經
運足綱額且殘引向在額引以內初非額外增加
卽有食岸融銷而於綱岸減運仍不足數其中未
完雜項均屬撥解要需正須運鹽完課藉資周轉
勢難停減不行

臣於上年

奏明將新殘及融楚引鹽分別勻配嗣又準核催商

一併完課趕運當此運庫支絀

國用孔殷不能不酌劑權衡先其所急應仍照案辦理以期庫貯商情兩無窒礙均議行喚咭喇遣使羅伯孫等六人來省控訴青浦縣看守減歇糧船舵水與夷民麥都思等爭毆受傷事以理諭遣旋委布政使傅公繩勛往上海理之釁端頓已哦囉嘶國船商李噸北請於上海貿易因飭上海道責以違例乞請不能據奏立限回帆該商卽起旋駛

回覬覦亦絕各夷帖服無異議南河河務向係兩江總督兼轄自辦理夷務停止兼轄者六年二十七年丁未十月奉

上諭兩江總督向有兼轄河務之責自道光二十二年起因他務未能兼顧嗣後仍着該督兼管以符舊制欽此故事總督兼河於三汛及糧船重空兩運均須駐工會辦府君揆度時勢以上海互市江防緊要特疏請隨時兼顧無須駐工疏畧云伏查兩江自辦

理夷務經前督臣奏奉

諭旨暫不兼河臣亦一律遵守茲據河臣咨送摺稿聲明

舊例請

旨勅臣兼河欽奉

恩俞臣何敢稍存推卸惟向來督臣兼轄於河工三汛及

糧船重空兩運均至清江籌催現當上海通商江
防緊要計清江相距水程一千餘里中間江湖修
阻郵遞每至稽延若仍遠駐防河甚慮鞭長莫及

且臣於河務夙未講求諳習焉敢強不知以爲知
似應量爲變通隨時兼顧無須駐工日久一切宣
塞機宜勘驗款項河臣自有專責非臣力所能堪
至在事文武各員人才之賢否工段之虛實必與
河臣破除情面嚴加甄劾不受德而受怨不辭過
而辭功以期實力同心維持風氣奉

硃批均係國家政務卿年力正強勉力爲之以副重寄欽
此二十八年夏江南北苦雨江湖並漲重以川廣

一帶來源亦旺海口去不能暢行府君熟察水勢先後會商河督啟放家堰仁禮智信河壩及車邏四壩林家西壩昭義河等壩水勢得以平落旋堵築如初農田皆無損他如海沭等處之六塘河海州之薔薇河沛縣之寨子民堰皆先後借項修復徐通海一帶民利賴甚溥其年九月奉旨兼署南河總督卽日駐工修濬隄防日無暇晷旋以霜降安瀾奉

旨議敘河工員弁向多聚處清江特疏請飭歸工次其畧
云查南河四道管轄同知廵判二十三員缺分繁
簡不同里數遠近不等要各分汛地例應常年
駐工隨時實力修防斯爲無忝厥職近年以來惟
徐州常鎮道屬十廳照舊分駐工次至淮揚道屬
七廳淮海道屬六廳率多聚處清江廳署幾同虛
設非遇盛漲搶險皆不到工因而實任佐雜各官
營汛備弁鮮不尤而效之視隄防如傳舍卽奉委

防汛候補人員亦多安坐寓中並不親往幫辦殊
非慎重要工之道且清江人稠地隘風氣虛浮廳
員本有職司乃若一無所事遊戲徵逐耗費實繁
甚或競尙夤緣希圖侵冒一筆居終日弊不勝言吏
治河防均有關繫臣已嚴飭該管道將卽令實任
河廳文武員弁務各親駐工次不准在浦逗留自
耽安逸其餘防汛委員均應到工辦事藉資照料
亦免惰游違者分別叅處又淮海兵備道舊駐海

州所屬之安東縣原爲彈壓海疆近亦常年在浦
併飭河務稍定仍當前往安東隨時督飭俾地方
獄訟早結緝捕加嚴上副

朝廷分職任官之意蒙

硃批嘉獎並奉有務矢公忠勿避嫌怨之

諭又疏請汰裁河工浮費其畧云竊惟鹽漕河工爲江南
三大政顧生財者鹽漕久已困於不足而耗財者
河工稍可節其有餘加銀貴錢賤今日之通患也

獨河工領銀易錢視昔已加一倍就使夫料價值
逐日增昂仍當有盈無絀向來歲料防料多未按
候發齊亦爲節省起見不知實發愈少墊辦愈多
廳員以准駁爲盈虛上司以愛憎爲准駁甚或庫
貯之數墊辦幾半臣於接見廳屬每詰以此等鉅
款從何而來鮮有不辭窮者究之廳員領項又復
名浮於實非特自道而院自院而庫丁胥勾串易
滋弊端卽經費夫土三釐等項通計數頗不貲輒

爲各衙門吏役飯食津貼以及各營各堂捐款香火諸名目層疊攤扣所贖幾何且聞過客求幫從前或具公領請庫墊發隨後劃扣領款尤堪駭聽皆浮費之爲害也故欲杜絕虛糜必自革除浮費始欲革除浮費必自嚴飭道廳始欲嚴飭道廳必自河臣正己無私始以臣約畧計之南河四屬二十三廳每年尋常例用當以三百萬兩爲率內如淮揚道屬淮銀一百三十萬兩徐州道屬淮銀八

十萬兩淮海道屬准銀八十萬兩常鎮道屬准銀
一十萬兩似已度支無缺雖水勢有大小工段有
增減未可執一以求要之成算在先所請例銷正
款孰虛孰實無難叅考分明設有另生新工河
督同該道立即馳往勘估驗收復加核實或值倉
卒之頃小有墊用亦應確查補給不准空報浮開
留抵刪數似亦範圍不過之理臣於本屆銷算稽
核從嚴共刪銀四十萬兩零比較上年准銷少銷

六十萬兩零無庫欠之找發有欠庫之扣還絕不敢操之過急祇以當費不可省當省不可費果能留意撙節年復一年積少成多截長補短財不虛耗是亦生財在河員不免相尤於

國用未始無補新任河臣楊以增計日到浦接篆其

廉明靜密熟練修防非臣所能企及惟當和衷商

榘務令全力鉤稽以期浮費先裁虛糜漸絕各清各款無濫無苛仰副

高厚生成於萬一謹據實縷陳奉

硃批工部議奏旋報准十一月回本任以述職屆滿請

覲奉

硃批朕非不願與卿相晤然總因公事繁雜難離本任可
暫停來京下屆奏請可也欽此戶部議裁辦漕浮費行
令會同漕督倉督聯銜具

奏府君念漕務積弊以各清各弊爲主毋庸再議聯
銜因具疏上陳其畧云竊惟浮費之起始由有漕

各州縣漫不加察委任丁胥朘削民膏飽充私橐
甚至官爲役用亦思歲取盈餘於是漕稱利藪弊
端百出其先幫船之弁丁其次閘壩之夫役通倉
之經紀舍人遞索規費漸增漸浮至於此極故變
本加厲之害實皆州縣作俑致以幫費啟紛爭而
截流清源之方又必幫費從輕乃爲州縣資樽節
凡論江蘇漕政均自裁減幫費始然一減於前撫
臣岳起再減於前督臣孫玉庭非不斟酌曲當究

之費且日增轉視奏明數目以爲分所應得卽上
年署撫臣程霜采漕臣楊殿邦會奏大加裁減仍
未見有實濟書所謂非知之艱行之維艱也試以
收漕論官與民相持花戶畧爲觀望而漕誤矣以
兌漕論縣與幫相持弁丁故爲渙散而漕誤矣又
或漕行限迫必叅州縣以遲延地方累深必指漕
幫爲挑斥此不待過淮抵壩而已各執一詞均非
無見蓋督責愈急則弊愈生指陳愈繁則弊愈雜

多一防弊之法卽多一索費之門此時蘇漕重困
有未敢縷述者今有人病在膏盲形同痿痺積日
累月寸步爲難卽令和緩醫調尙未必無他慮若
加攻伐之劑遽求旦夕之功診候各殊紛如聚訟
始則以藥治病繼且以藥治藥勢將動觸危機不
可救藥而後已漕務之弊與此畧同臣目擊情形
杞憂倍切事關

國家大計稍一不慎決裂滋虞惟當防於未然去其

太甚誠如戶部議

奏經理漕政事本相因其中交涉弊端則以各清各弊爲主似無須再議聯銜可否請

旨飭下有漕各督撫及漕督倉場衙門務各屏除成見共矢同心勉圖整頓之宜嚴絕推諉之習庶幾人和感召年穀順成仰副我

皇上愛民裕漕之至意報可是月奉

上諭前因戶部奏籌備庫款一摺當派宗人府大學士軍

機大臣會同戶部妥議茲據王大臣等議定准駁并仍會同戶部另議章程五條開單具奏朕詳加披閱尙屬周妥總之有治人無治法窮變通久全在因時制宜除實有不便於民者准該督撫奏明外其餘令在必行諒不敢莠言亂政欽此府君熟籌利弊披瀝直陳其畧云

臣

伏思法無久暫待人而行治有經權以時爲大蓋因民之所利而利之卽以美利利天下也惟利與弊相因有利不能無弊與其補救於事後莫若

預絕於事先故當慎初惟終尤當思艱圖易此次
王大臣會同戶部另議章程五條胥得裕
國便民之要奉

旨令在必行洵無不可行者竊以事關重大務期行之久
遠毫無流弊自不憚再三詳慎共效芻蕘如錢糧
積欠一條應行澈底核辦非清查不能截數非抽
查不能見真誠得

欽使巡行立可破除徇隱惟清查重在彌補如江蘇州縣

向多墊銀完漕而以漕尾作抵此外官虧役欠待
追待變之款率皆列爲存庫非盡實在現銀恐日
久套搭漸成虛帳是以

奏請清查節經撫

臣

會同飭辦必先釐定款目分別

有著無著現官本省外省核實照數催追不肯任
其決裂計奉

欽使抽查自須彌補以後彼時已由藩司依限提銀造冊
報撥並不存留屬庫似應以藩司撥冊部中執爲

定案指撥不能應解卽行從重究懲若

欽使遠來周歷外郡文案則冗繁難理官員則接替靡常
旣未能專駐一隅致顧此而失彼卽不免暫支一
候仍暮四而朝三行者有跋涉之勞居者以送迎
爲事追逋而外恐益差徭此抽查積欠之不能無
弊也如漕糧折色一條奉行原有成例自可著爲
新章一便糧戶之輸將一省幫丁之津貼事半功
倍無過於斯現議準米折銀以百萬石爲率統計

有漕省分爲數無幾亦極簡易可行應與撫臣咨
飭商辦惟州縣本折兼收原爲幫費之用銀錢究
無定數各視地方情形裒多益寡若榜示定價折
收解部則必通省一律多者不見少少者乍見多
且必全數徵銀正當銀價日昂遞年分成加展尙
須預爲計及至

天庾之儲最關鉅要奉天河南陝西各省雖可循案
採買然或年景不等糧價不等運腳不等招商海

運更難懸定數目似應由

盛京將軍河南陝西巡撫於來歲先行試辦商販商
買能否津市雲集共得糧石若干京倉支放有餘
外省再定成數折銀解部此漕糧折色之不能無
弊也如長蘆山東酌改鹽法一條現經

欽派王大臣前往查辦必能詳定規模折衷

乾斷以興禹筴之利非

臣

所敢與議如河工節浮費裁冗

員一條東南兩河

臣

實專其責

臣

於兼署河督任

內曾以欲絕虛糜當除浮費附片縷陳併各廳汛
冗缺應與南河督臣會查再定如礦廠可廣開採
一條臣所轄江西省舊有封禁山與浙江福建接
壤每歲三省總兵會哨巡查現在有無礦苗能否
開採應與江西撫臣閩浙督臣撫臣體察情形會
商妥辦亦非臣所能遽議臣所兢兢持議者實願
天下大利

聖主爲民開之民爲

石折銀一兩粟米每石折銀七錢五分止改兌米
每石折銀一兩二錢例價爲數甚輕照此折收官
民稱便惟南方糧值賤北方糧值貴加以水陸運
腳非例價所能採買不得不酌量議增而示諭例
有明文漕政攸關迥非州縣通融辦法若就州縣
折色分別輕重等差無論各州縣情形不同卽一
州一縣中情形亦各不同治絲而棼幾無端緒且
不能舍戶部定例轉執州縣勒價爲憑多則徵收

不前官項又將那墊少則採買不足倉儲待至周章此

國計之難也通行一條鞭徵法易知易從今以某州縣額漕內應折米若干某里某戶額漕內又應折米若干數目奇零催科細碎糧冊糧票開載愈繁且如折銀完漕按照市價而銀價時有長落將今日少完明日復多完乎年景時有豐歉將今歲少取明歲復多取乎小民正愁穀賤兼值銀荒以有

易無展轉虧折而又不得確數輸將恐後仍歎追呼此民生之難也州縣藉有幫需不免私收折色然以羨補不足尙未敢顯著爲令且皆制錢洋錢隨便抵算非若折漕解部必須一色現銀今如明示折收又未通行定價州縣將無顧忌以公濟私甚至爲通收分解之弊徵收從重報解從輕視幫需爲盈餘併火耗以加費迨經查出叅究閭閻受累已深况運費能減不能裁如今折色若干全行

解部本色若干將何交幫勢非折而又折不止此
防州縣浮勒之難也吏胥爲良民害由來久矣江
蘇漕額最重科則最重糧書經造勾串詐混亦最
重卽照定額徵漕弊已層出若復兼收折色聽其
參差不齊此輩因緣爲奸更可高下其手多一名
色多一利孔本官固爲所挾持上司亦不勝拏辦
脂膏朘削究惟編氓任之此防吏胥訛索之難也
夫法窮則變原可更新變而難通不如守舊臣有

統轄之責既未能力辦全漕復何能膠執臆說茲
事體大他省賦輕額少或可議行獨於江蘇時勢
揆度利害總覺行之維艱同一爲

國爲民王大臣籌議於內疆吏籌辦於外均非意存
成見伏讀

上諭準米折銀以百萬石爲率係約畧之詞亦在該督撫
等權衡緩急施行欽此又王大臣奏稱不得已議及折
徵如何核辦方徵妥協等語仰見

宵旰勤求盈庭襄贊祇期萬全無弊此中委曲繁重卽

臣

備員江省亦未敢自信周知欽奉

飭發折漕酌辦章程六條謹當會同江浙撫

臣

再三悉心

參酌或兼新議或仍舊章或民折官辦地方徑行
解銀赴部或帶徵緩漕屆限專款折銀報完利取
諸因事惟其便不敢以一奏塞責疏入奉

硃批原議王大臣等會同戶部議奏欽此越旬日巡撫陸
公建瀛上折漕未便疏旋至奉

硃批如府君疏四月初八日原議王大臣覆奏上奉

上諭前據李星沅陸建瀛先後具奏南漕改折流弊易滋
諸多窒礙各等語當交原議王大臣等會部議奏茲據
悉心覆議具奏應如該督撫所請毋庸議折本日適據
耆英奏到南漕暫緩改折一摺朕詳加披閱折漕之議
原因外省州縣折色過重徒充私橐轉絀正供因力求
變通令各就往年徵糧實數酌減徵收期於興利除弊
既據該督等以種種格礙難行分晰陳奏惟恐不肖州

縣借折色之名抑勒倍取是便民之舉轉致病民亦不可不防其漸所有各省漕糧著准其仍照舊章辦理毋庸分成議折但變通既恐滋弊守舊宜復成規漕糧爲天庾正供不容顆粒短絀封疆大吏尤當激發天良隨時整頓嗣後務須實力徵收全漕兌運倘各屬有捏災註荒及官吏私徵中飽州縣浮收勒折等弊必嚴加釐剔其不肖州縣肆無忌憚如敢浮收勒折病民肥己一經查出卽著指名嚴叅治罪毋稍姑容該管上司倘有

意存徇庇者著一併從嚴叅辦經此次申諭之後如該督撫等仍漫不經心諉之於弊難周察相率因循或不竭力思辦全漕任聽屬員捏報災歉朕惟有執法從事恐該督撫等不能當此重咎也時府君方在病中折漕一疏力疾創稿事旋獲寢天下仰頌

皇仁而府君惓惓不已之苦衷得曲邀

聖鑒尤非意想所及也方戊申春長兄

杭

在籍病歿太夫

人以痛孫致疾府君深憂之其年秋大水親巡江

淮籌辦撫卹出江宜豐備倉揚州鹽義倉各州縣
常平倉社倉穀石碾米放賑並倡捐廉金率屬伙
助參用圖賑法收養資送相輔而行目擊災黎引
咎刻責減寢損食冀紓民困扁舟風雨中二十餘
晝夜自忘其瘁流民甫得安集適有防河之行維
時抽查賑務籌剿余山洋盜案牘填委日不暇給
及督河得代回江南而脇悶食逆手強等症相繼
作至是心口舊有之肉結抽掣作痛醫者慮其成

疽乃以正月杪請假半月奉有不可妄投補藥之
諭旋以醫治無速效續假半月仍不愈乃瀝情陳請開缺
疏入之日適江南鹽巡道積喇明阿公以新擢閩
臬入對

上詢府君病狀積公縷悉陳奏

上歎曰李星沅年力正強何至遽有此疾看來必得安心
調治始能全愈云云遂蒙

恩旨開缺回籍安心調理府君感激涕零具疏陳謝奉

硃批一俟痊愈卽行來京朕切望之至卿當諒之欽此四
月卸事南旋府君督江南未周二載於吏治營務
鹽漕河諸大政因革損益知無不爲任勞任怨心
力交瘁其成效昭然可考至與駐防將軍都統漕
督河督三巡撫提督開誠布公和衷共事無纖芥
不合有識者尤爲稱美謂得古大臣寅恭之誼數
十年所僅見也去任之日吏民多泣下走送或至
數程府君亦感喟累日五月歸長沙私第訪名醫

得傳藥法朝夕敷治冬至後疾少閒念太夫人春
秋高又病手足痿痺欲疏乞終養格於例懼不得
請擬俟春深舊疾不復作卽入對陳情越明年庚
戌正月

成皇帝升遐

今上登極卽具疏請謁

梓宮報可遂輿疾行五月到京隨班叩謁號痛幾不能起
召見二次

上詢厯任各省有久任封疆

皇考重用求再見不可得之

諭嗣蒙

垂詢病狀因奏言

臣

疾可冀痊愈正擬銷假當差惟母

老卧疴未忍遠離伏乞

天恩准

臣

歸養奉

諭云爾在兩江告病何不告養府君謹以違例對

上又詢太夫人歲數病勢皆一一陳奏旋蒙

恩得回原籍六月歸長沙具疏陳謝其畧云伏念臣病

原於母病義有難言

聖心本卽

天心

仁無不至凡此下情之上達悉由

大造之

宏施

俯鑒烏私曲荷

生成於格外彌殷駑負勉圖報答於方來奉

硃批知道了欽此家居半載日夕侍太夫人色笑適楚
省奇荒捐重金助賑濟所讀書藏之小樓顏以海
粟曰人與書皆滄海一粟也侍養之暇輒爲詩歌
以自遣然憂

國之念時流露吟咏閒十一月十九日夜半接准兵
部公文內開十一月十二日內閣奉

上諭李星沅著作爲欽差大臣頒給關防馳驛速赴廣

西辦理剿捕事務現在平樂一帶賊匪迭經擒剿漸就殲除惟左右江各屬股數尙多亟應乘勢撲滅著該大臣會同署巡撫周天爵勞崇光提督向榮張必祿等督飭文武實力剿辦綏靖巖疆以副朕望欽此
時太夫人老病侵尋府君舊疾亦間作或勸爲疏辭府君毅然曰吾以孤寒受

成皇帝特恩濫竊高位涓埃未效遽以疾歸

今上召對復蒙

鴻施破格俯准陳情茲邊疆有事

詔起督師此臣子效命之時得稍酬

高厚者也何辭爲辭氣慨慷聞者感歎太夫人揮涕諭
之曰忠孝不能兩全先國後家可也越日拜疏行
是月晦抵全州聞張公必祿卒於軍越十二月朔
二日抵桂林時粵西南太一帶土匪羣起爲亂出
沒不常而潯州府附郭桂平縣屬逆賊韋正馮秀
全卽馮雲山等糾集徒黨數千人盤踞金田村勢

尤狂悖或謂府君宜卽駐劄桂林居中控制府君以爲距賊遠調遣多後時爰披輿圖集官紳會商以柳州府城地適中與南寧太平慶遠思恩等府聲息易通便策應而水路下潯州一日夜可達尤得建瓴之勢乃決策駐柳州並疏陳籌剿事宜六條一整軍伍一聯兵勢一偵賊情一散賊黨一嚴守望一廣投效撮其要爲文告十數通徧戒軍民大申威信並刊刻嘉慶初年蘭州太守龔景瀚堅

壁清野議劄發各州縣因地興辦又以向未服官
粵西營制將才兵力民情驟難具悉疏留前巡撫
鄭公祖琛暫令隨營効力又以提督向公榮獨任
剿賊指使乏人疏請添調將弁藉供差遣疏畧云
提臣向榮身先士卒奮勇轉戰臣愛之重之憾不
能披堅執銳與之左右亟願多得裨將藉供臂指
因請調雲貴湖南將弁多員迅飭赴粵又疏請軍
餉三十萬兩均如議又疏調廣東潮州兵一千名

循林文忠公原奏也後兩廣總督徐公廣緒疏寢
之旣望進駐柳州先是黔兵二千於十一月二十
九日進攻金田村失利陣亡副將以下十餘員兵
氣頗挫半月未一接及府君以金田賊勢方張亟
須厚集兵力爲聚殲之舉時提督向公榮統帶楚
兵二千方剿橫州土匪連次獲捷聲勢甚盛雲南
臨元鎮總兵李君能臣統帶滇兵二千甫抵果化
亦擊斃義勝堂賊無算皆稱勁旅府君飛檄速之

齊赴潯州相機合剿黔兵係副將管領軍士多玩
乃疏調貴州鎮遠鎮總兵秦君定三赴粵統帶以
其會官粵西習形勢也其南太諸賊嚴劄責成左
右江兩總兵督帶兵練沿邊會哨以剿爲堵又以
軍令首貴嚴肅特疏劾從前堵禦失利之副將游
都等分別革訊枷號有差均如議行潯州東界藤
縣修仁荔浦西界貴縣遷江南界鬱林北界武宣
象州府君策金田賊眾食盡必且四出抄掠酌派

兵練分隘堵截所斬獲甚夥修荔兩邑多猺山猺民素矯健賊思誘以爲應府君設法開導曉以大義並酌雇猺練藉爲聲援以是猺民無從賊者各路糧臺浮費如長夫坐船站規各名目嚴加裁汰而兵練有功則獎賞悉從優厚咸豐元年辛亥元旦犒勞戰士客兵人銀五錢本省兵人銀叁錢皆與提督署按察使議定無成例也飛催滇楚兵集潯州羽書日三四發會淫雨連日師艱於行飭各

路糧臺急治雨具按營分給以是軍行無苦比三省之師將集而逆賊聞聲已先潛竄大黃江墟矣初賊之踞金田也以背紫荊朋化諸絕巘面大黃江山水環繞恃以爲固迨聞我三省兵力未集且附近村落擄掠皆空遂自焚巢穴潛出據江墟府君飛飭邊潯各州縣申嚴防堵一面函催提督授以布置率師進攻十八日三省兵進擊江墟合粵東及本省官兵水勇由平南繞出賊後分中左右

三路進剿殺賊數百中多蓄髮寸餘者將抵牛排
嶺地勢尤險恐中賊伏乃止舍而被脅者解散至
千餘人皆金田附近農民也其太平府土匪潘大
等經府君飛催右江鎮總兵帶兵進剿連次斬馘
六百餘人並生擒蒙世梅等數十人賊膽落分竄
復添兵一千飭左江鎮總兵合攻之二月議再攻
江墟以墟場竹木蒙密用火攻策時湖南所造火
箭已押運在道飛令促之復於柳州開局監造陸

續密達軍中朔八日夜西南風甚後路水勇出賊不意乘風發火箭數千茅屋竹林火作光照耀數里賊大驚三路兵皆殊死戰進奪牛排嶺斃賊以千計縱火焚其巢賊大奔官兵追斬多名桂平知縣李君孟羣帶練駐新墟要截亦有斬獲賊黨冒死緣巖壑竄入武宣東界武宣迤東一帶數百里林深箐密山徑錯雜先經府君飭辦團練應募者至八千人又益以官兵數百名分險堵截賊獠騰

蟻伏預於峯頂下木石以禦追者我兵仰攻不能
得手而賊黨遂竄據東鄉賊始事時號稱萬人至
是已折其半府君議督師急擊維時署巡撫周公
天爵赴潯州道武宣遂駐軍督辦自是軍令歧出
府君亦不能自行其意矣方周公天爵由桂林至
柳州商扼要分駐之地其時潯州大軍剿賊方急
府君擬親赴潯郡指揮將士以柳州爲桂林門戶
又南太土匪方肆披猖請周公暫駐鎮壓周公以

督師宜居中調度堅欲親赴潯及賊竄東鄉府君
謂當速戰攻其未備飛催提督及滇黔兩鎮策勝
兵乘賊之敝四面攻剿周公以賊勢方張意主持
重議請調北方勁旅萬人俟其至日將現在三省
兵全數撤回歸伍府君以北方勁旅於粵西水土
不宜函止之提督向公議調河南馬隊二千府君
以粵西山徑險僻人猶苦攀援馬隊不能成列亦
寢其議遂添調雲貴精兵二千並疏請軍餉八十

萬兩皆如議旋以武宣後路桂平平南一帶爲四達之衝恐賊乘虛回竄益蔓延不可制函請周公赴潯駐劄而令駐潯之署按察使楊公彤如速赴武宣近受籌策會諸軍進剿前後夾擊周公未允府君慮事權不一必致多費時日益增

宵旰南顧憂遂會銜奏請

特簡總統將軍督辦以一事權並聲明臣等仍不敢置身事外疏入初奉

諭申飭越日有

旨特派大學士賽尙阿公馳赴楚粵交界地方督辦防堵事宜並奉

諭李星沅周天爵向榮等不得各持意見致失事機云云府君凜遵

恩訓凡有商榷平心處之其不能曲從者亦但指陳情勢據理阻遏無一語叅私見然心力益瘁矣二月十七日及三月朔二日官兵兩次進攻東鄉不克

復添調四川湖南貴州精兵各一千名又奉

諭特派安徽兵一千名協剿周公疏調北兵二萬人並
引疾陳請開缺府君以籌剿不力引罪自劾疏請
嚴議皆不允維時左右江兩軍進剿龍州上林諸
賊官兵復有疎失而鬱林懷賀一帶復有廣東欽
靈逸賊凌十八等乘之將與韋逆等爲應府君飛
飭李君能臣統帶滇兵迎擊深懼顧此失彼滋蔓
難圖籌餉徵兵焦慮萬分重以力與心違積憂廢

餐寢自二月以來衣帶日寬肌膚銳減至是月二十六日而疾作矣先一日探知武宣大軍諸將不協卽出令移營親赴武宣督辦是日方據案創移營疏稿右手忽作顫旋昏暈大汗踰刻始清醒連服養心理脾暢肝之劑日三四次進軍士惶懼府君強起飲食接見官吏料簡軍書如常眾心以定晦日訊已革潯州協副將李某等聲猶達帳外四月朔由柳州移軍初四日駐軍武宣舟行觸冒瘴

癘兩足不能舉疾勢益甚然與在事文武籌商機
要舉師克在和之義曉譬諸將復申嚴軍令反覆
戒諭至泣下若自忘其有疾初七日聞李君能臣
鬱林之捷振衣而起以爲賊後已斷前路可刻日
破也十一日辰粥不能咽精神益覺難支乃疏陳
病狀請將

欽差大臣關防暫交巡撫監護疏畧云伏思臣一介書
生過蒙

天恩渥膺

重寄自上年十二月馳抵柳州籌剿殫竭血誠今已數

月賊眾猶熾金田巨匪潰出武宣東鄉復經撫

臣

周天爵提

臣

向榮疊次進攻未操全勝而南太潯

鬱等處羣盜蟻聚勢難迅掃

臣

憂心如焚誠恐大

局糜爛莫收已據實臚列入

告仰蒙

皇上聖念邊徼元元塗炭

洞知粵地賊眾我寡

特簡重臣督師楚粵之交以壯聲威而破賊膽復

諄諭

臣

等齊心一力迅速藏事

臣

且感且憤不遑寢食

決計親往行營拊循將士以期一舉撲滅正在部

署舊疾復作上月二十六日晨起執筆頭目暈掉

汗出不已並進養心理脾之劑數日稍見輕減

臣

輒星夜馳往舟行觸冒霧露心氣既虧兼感瘴癘

四肢痿頓不舉疾勢日甚既抵武宣撫

臣

周天爵

提臣向榮皆來就商軍事且視臣疾臣以爲諸軍

旣已堅守若能調和將士及早破賊則臣病自愈

矣在事文武日來進謁而臣偃卧在牀精神漸覺

惴恍殊難支撐伏惟軍事重大萬不敢因疾置身

事外亦未便乞假遷延致諸軍聞而懈弛惟所畀

欽差大臣關防係出

特旨所關甚鉅欲卧而護之則病中恐有疎虞若徑行

交出迹似推卸再四熟思惟有將關防暫交撫臣

行營遇有調撥卽由撫臣監用旣足以昭慎重於

軍事不致曠誤臣上緊醫治一有起色卽躬往按

行營壘倘竟彌留則臣雖竭力盡瘁隕首瘴鄉不

足塞責矣拜疏後方就枕氣喘不能止至十二日

益劇午刻口授不孝概爲遺疏於賊不能平謂之

不忠養不能終謂之不孝四語及粵西宿將獨向

榮可倚一語言之至再至未初刻遂長逝烏乎痛

哉卒之前二日隨營僕從以府君病劇急求秘器

不可得訪知秦某家藏一具木堅細久存至三十
餘年然其家距大營甚遠乃設法購得卒之日木
適至 不孝慨泣奉以歛軍中吏士咸以爲忠勤之
報烏乎痛哉遺疏入

上欵獻悼惜

諭曰前任兩江總督李星沅由翰林敎歷外任疊蒙
皇考簡畀封圻因剿辦雲南漢回軍務

恩加太子太保銜賞戴花翎旋令總制兩江嗣以病請假

回籍上年來京召對朕見其精神強固年力方盛足資倚畀因其母老多病俯准所請俾令歸里侍養冬間廣西盜匪滋事特授爲欽差大臣頒給關防令其馳赴該省剿辦歷據馳奏籌畫軍情均能周妥昨由柳州力疾進駐武宣正擬親督將士埽除羣醜乃甫報病勢增劇卽聞溘逝披覽遺疏詞意憂憤悼惜殊深念其不遑將母沒於王事尤堪憫惻李星沅著加恩照總督例賜卹任內一切處分悉予開復應得卹

典該衙門察例具奏並賞給銀五百兩經理葬事卽
著湖南巡撫於藩庫內支給頒去人費十兩交駱秉
章一併派員送致其家賞給伊母俸資調養李星沅
之次子李概三子廩生李桓均著俟服闋後交吏部
帶領引見候朕施恩欽此旋經禮部以卹典上奉
旨著予諡賜全祭葬

予諡文恭禮部來文曰據諡法勤學好問曰文敬慎事
上曰恭伏案文恭之諡

國朝得之者凡十六人大學士九尙書五左都御史
一將軍一總督得此諡者自府君始誠

特恩也士大夫僉謂府君一生謹慎執事堅固易名褒
美允符其實况遺疏上陳仰蒙

聖明察其憂憤載在

諭旨宣示中外足使盡臣心跡昭然若揭至飾終令典
至渥極優老母諸孤悉承

寵眷

恩言脢詳天下傳誦可謂死而不朽云府君天性純摯
自壽田公卒歲時祭祀哀慕不自勝由諸生及貴
每一遷秩輒念壽田公不及見顏色甚戚絕無歡
容事陳太夫人孝敬兼至或侍疾眠餐輒減初撫
陝之年冬太夫人偶感寒疾府君躬親醫藥數夕
不少休自忘其瘁同城官吏見者訝稱肌膚減損
始自覺與兩叔父手足之愛極厚至老如少歲乞
養歸嘗於第東小園築屋三楹取蘇氏詩意顏曰

對牀聽雨之軒每敘坐輒曰此平生未有之樂也
友于之好見者歎美適張適楊兩姑皆早寡勗甥
輩讀書獎勉甚力期得科第以慰兩姑心適黃氏
姑從姑丈京居素多病十年以來寄藥貲歲時不
絕與郭夫人貧困相莊及貴仍如微時方按試雷
州府奉

諭裁革陋規夫人馳書以此鄉多寶玉慎弗厭清貧爲屬
府君復詩有清貧兩字寄拳拳之句督運河南夫

人自京至府君曰何以勉我夫人曰君以寒士入翰林三掌文衡一擢高等使旋未復

命先拜郡守不數月載陟監司遭遇隆矣宜亟圖報稱府

君敬謝之其素相刻勵如此夫人卒府君哭之慟

爲撰行畧行於世教不孝等極嚴或越家誡雖在

客前誨督不少假長兄杭成進士府君方撫陝具

疏陳謝奉

硃批殿試朝考名次均高甚有出息欽此及謝改翰林疏

入復奉

硃批勉力訓導立品爲先欽此誨督仍如往時不以旣通

籍而稍寬也戊申春長兄

杭

病歿府君悼惜深念

其早慧早達早死命

不孝概桓

爲編次遺詩以行

治家必以禮法男女皆黎明起內外整肅僕役非
呼召不敢入家廟譜牒皆分俸修輯與族屬敦信
修睦尙辭讓官至極品合族百餘戶無倚勢干法
令者躬行儉約雖至貴無重器物服用但取給署

河督至清江時河工風氣務爲奢靡初尙穿珠補服值甚昂或言於府君不之信曰吾所見無著此者蓋屬吏叅謁或易服以見也生平以莊敬日強深自刻勵雖酷熱無褰袒輿馬登程雖揮汗終不免冠或行數十程皆如此平居坐毋箕踞言毋戲謔行毋疾趨治性理務精要於宋五子書外尤熟呂新吾全集督運河南舟中清暇摘錄呂語千餘條真書爲一冊置座右省覽後官各省輒入篋自

隨置日記本所爲皆載之曰以省愆也重氣節少
孤貧受人餽遺不言謝及貴縮俸酬數倍居官一
秉公正務持大體興利除害斷然行之身犯眾忌
知而不顧事

君務矢誠敬深凜勿欺之戒章奏條教必可覆按而後
發督師粵西以軍務奏報向多失實初至與文武
約凡諸稟啟不得有一字裝點嘗致向公榮書有
云我輩以誠事

君總不可稍涉粉飾想盡懷必同之也向公感服所咨
報接仗情形絕無鋪張語生平待師友極厚鄉試
房師胡竹安先生卒郴州任貧不能歸爲經紀其
喪並分俸助旅資置薄產一家得粗給亡友周調
臣石帆郭芭泉吳瓊仙諸丈皆爲梓其遺集戚好
諸丈有急輒以時濟之喜讀書微時客遊四方多
借書觀覽厯外任皆繁要區然公務稍閒輒手一
卷嘗歎書生結習終不能忘所著梧笙館聯吟初

輯已梓行芋香山館詩文全集藏於家乞養歸田
嘗欲編次付梓未及半以督師西行中止今遽成
未卒之業矣烏乎痛哉舊患失血疾通籍卽全愈
及軍務憂勞不孝等輒恐肉結復作痛偶請啟衣
視之肉色益白方私幸傳藥之有驗也豈意氣血
兩虧不能貫注至此耶性素惡藥嘗歎兄杭之卒
以好服猛劑故持藥戒益堅歸田時立五戒此其
一也然自柳州移軍日夕服藥無難色每服必曰

有驗烏乎府君深恐士卒惶惑故雖病劇不形於
言所以鎮定軍心者用心之苦遂至此耶十二日
辰刻不孝概請進薤汁始諭云吾病不能起薤亦
何益惟身後愆尤萬無可追耳及大漸以手捫心
者再乃卒烏乎痛哉享年五十有五配郭夫人

誥封恭人

晉贈一品夫人湘潭進士鄠縣知縣諱汪璨公女先卒
側室杜孺人衛孺人盧孺人子五長杭道光癸卯

舉人甲辰進士翰林院編修先歿次概鹽課司提

舉銜三桓縣學廩膳生郭夫人出四榛五梳側室

衛孺人出女五長適道州國子生何慶涵編修名

紹基公長子次殤郭夫人出三殤四五待字側室

衛孺人出長婦湘潭郭氏進士候選知縣諱如翰

公女繼長婦善化徐氏候選縣丞名棠公女次婦

益陽湯氏戶部郎中諱鵬公女三婦長沙周氏陝

西延榆綬道名鳴鸞公女四婦聘長沙彭氏廣東

高州府知府名舒萼公女殤孫一

輔耀不孝桓出

府君命爲長兄

杭

後孫女五府君之抵武宣也以

其城小人稠卽駐軍舟中距東鄉賊巢十餘里賊
訶知府君病且篤屢遣游匪擾楚黔兩軍然怯弗
深入及卒之明日大斂三軍皆哭聲震原野賊驚
疑仍不敢逼越四日乃傾巢突竄象州中坪墟一
時軍士咸痛長城之失相與悞悼烏乎此正府君
瀕死引罪痛憾於賊不能平之苦心也痛哉痛哉

不孝等心思禱昧於府君學行功業之本不能窺測百一謹就平昔所聞見太夫人兩叔父所諭知及府君日記所紀載者述存梗概深懼脫漏猶多不勝號痛悚惶籲天請罪之至

祖慈侍下

不孝孤哀子李

榛概桓

泣血謹述

杭

賜進士出身翰林院庶吉士愚姪郭嵩燾頓首拜填諱